

KESABARAN BOEAT PEMBALESAN

ATAWA

NASIPNJA ORANG DIMADOE!

Satoe tjerita jang rame dan bagoes,
serta baek diboeat nasehat pada
semoewa orang.

Ditjatak dan Dikloearken
oleh

Toko & Drukkerij LIE TEK LONG

Pintoe Besar 16 en 18
Batavia.

Prijs f 0.80

Juni 1925.





KESABARAN BOEAT PEMBALESAN.

Tjoa Boe ada satoe ambtenaar militair jang berpangkat Tjihoei dikota Hoij-an provincie Titon. Ia ini ada saorang jang soeka minoem arak, boekan ia sadja, tapi istrinja poen ada soeka betoel dengan arak, hingga ini soemi istri djadi stel betoel bila marika doedoek minoem arak bersama-sama.

Berbedah dengan laen-laen ambtenaar, poen Tjoa Boe terkenal djoega sebagai saorang hartawan di itoe kota, lantaran mana namanja djadi semingkir terkenal dan ia ada di-enda sekali oleh pendoe doek dari kota Hoij-an.

Dalem roemanja Tjoa Boe ada idoep, laen dari istrinja djoega tiga anak, doea lelaki dan satoe prempoean. Jang lelaki bernama Tjoa Yam, Tjoa Liok dan jang prempoean dikasi nama Tjoa So Yong, satoe gadis jang ada mempoenjai ketjar tikan.

Oeroesan dalem roema selaloe ada di oeroes oleh ini nona sendiri, lantaran ia-poenja iboe ada lebi banjak toengkoelin tjawan arak dari pada berlakoe sebagi satoe njonja roema jang mengenal kewadjiban. Tapi berbedah dengan itoe ajah dan iboe, marika-poenja tiga anak tiada satoe jang soeka minoem arak, malah tjioem baoenja djoega merasa 'nêk.

Bebrapa kali Tjoa Soei Yong telah kasi nasehat aken itoe doea orang toea soeka boewang kasoekaännja minoem arak, kerna itoe ada satoe pakerdjaän jang tiada pantes bagi saorang jang mendjadi pembesar negri, tjoe ma soenggoe sajang nasehat itoe jang berfaedah saban kali diboewang kesamping. Tegesnja Tjoa Boe dan istrinja, Tiansi, tiada bisa boewang kasoekaännja itoe, jang ada saopama marika poenja djiwa.

* * *

Berbareng dengan itoe ada saorang jang bernama Tio Koei jang telah mendjabat pangkat Siang-si di Kota-radja dan ia ini ada saorang jang mengenal boedi.

Pada masa Tio Koei masi moeda, ia ada tinggal berdekatan sama Tjoa Boe, tapi maski itoe waktoe a ada saorang moeda jang perhatiken betoel beladjaran ilmoe soera jang ia tiada mempoenja ewang boeat teroes adjarannja itoe. Bla-

kangan baroe, ia bisa teroesken peladjarannja
tatkala ajahnja Tjoa Boe kasi ia onkost satjoekoep-
nja, kerna ini orang toea merasa soeka pada dia
itoe, apalagi meliat kamiskinnja Tio Koei mem-
bikin ia ketarik betoel aken oendjoek pri-kame-
noesiaän.

Demikianlah lantaran perteloengannja familie
Tjoa hingga Tio Koei bisa dapet pangkat besar,
melebiken dari pangkat Tjoa Boe, satoe pem-
besar militair jang setia dan bebrapa kali telah
korbankan tenaganja zonder memperdoeliken djiwa
boeat membaes boedinja negri, teroetama aker
oendjoek tjintanja pada tana aer.

Sebagi saorang jang berboedi Tio Koei inget
betoel orang poenja boedi, lantaran itoe ia selalo
tjari lowongan jang kosong boeat Tjoa Boe. Peker-
djaän jang terboeka ada sampe banjak, tjoema itoe
semoea tiada satimpal boeat Tjoa Boe, atawa
tegesnja belon terboeka satoe djabatan di bagia
ingkatan jang tinggi. Tapi pada masa ini tjerita ke
djadian, djoestroe ada terboeka djabatan Yoekek
provincie Ouw-kong, maka lantes djoega ia madjo
aken voorstel pada Baginda soepaja Tjoa Boe bisa
seraken itoe kewadajiban, voorstel manatelah ditrin

Dengen ringkes bisa dibilang Tjoa Boe tel
trima besluit keangkatan, satoe hal jang membil
ia djadi girang. Dan ia dapet taoe djoega a
pertoeloengan siap... oeda dikoerniaken i

pangkat, maka ia bersoekoer sekali pada Tio Koei. Kamoedian ia laloe bitjaraken pada istrinja, bahoea sigra djoega ia hendak brangkat menoedjoei ka tempat bekerdja itoe. Dan pikirannja itoe di setoedjoei oleh Tian-si. Tapi Soei Yong tiada setoedjoe dengan pikirannja itoe kadoea orang toea, maka ia laloe menjegah.

„Orang jang djadi pembesar jang soeka bekerdja di satoe tempat djaoe, bisa dipastiken dia itoe ada saorang jang melaenken ingin kabesaran pangkat serta mentjari hasil jang tiada halal,” kata Tjoa Soei Yong. „Tapi kita di sini segala apa tjoekoep dan ajah poenja pangkat ada sampe besar, apalagi di sini kita tiada mempoenjai moesoer jang bisa membahajaken kedoedoekan atawa poen djiwa sendiri, maka perloe apatah Hoe-tjin moesti pergi ka Ouw-kong, satoe tempat jang begitoe djaoe. Laen dari itoe, djoega Hoe-tjin da saorang jang soeka minoem arak, maka apa moe kasoekaän jang kliroe satoe waktoe tiada nanti membahajaken diri sendiri? Akoe harep arlah Hoe-tjin nanti soeka pikir hal ini.” „Perkataänmoe memang bener, Yong,” kata Soa Boe, „tapi sekali-kali akoe tiada moefaket, karena itoe ada pikiran tjoepet dari orang moeda. O Siang-si soeda begitoe soeka pada kita serta begitoe sendiri ada begitoe pertjaja padakoe begitoe soeda diserake kewadjaban, maka

apa pantes bila kita sia-siaken orang poenja kebaekan serta negri poenja kapertjajaän? Itoe sebab, akoe harep kae tiada oesah merasa koeatir."

"Memang djoega bener kita moesti hargaken orang poenja kebaekan serta negri poenja kapertjajaän," kata Soei Yong, jang masi menjegah teroes. "Tapi berbareng dengan itoe ajah moesti pikir djoega dengan kasoekaänmoe minoem arak, kerna dalem ini perdjalanan adalah arak saroeпа jang membikin akoe tiada bisa tetepken pikiran. Tjobalah Hoe-tjin pikir, apa kita tiada bisa dapet bahaya bila ada terbit perkara besar djoestroe Hoe-tjin ada dalem keadaan mabok? Oleh kerna itoe, lebi baik kita tinggal teroes di sini, jang soeda ada kepastiannja."

"Di sini atawa di mana-mana ada sama djoega apabila dirikoe bakal dilanggar kasoesaän," kata Tjoa Boe. "Djikaloe di laen tempat bisa terbit perkara besar, apatah kedjadian itoe tiada bisa terdjadi disini? Lantaran itoe baeklah kae tiada oesa merasa koeatir sedeng akoe sendiri nanti pegang betoel kewadjabankoe."

Tjoa Soei Yong djadi kewalahan meladenin itoe ajah jang bandel. Maski begitoe ia-poenja koeatiran tiada djoega bisa linjap, maka ia laloe kata: "Baek, djika Hoe-tjin maoe pergi djoega, tapi akoe minta kae soe pateddjandji aken djangan minoem arak selama di anberdjalanan."

Tjoa Boe djadi tertawa bergelak-gelak.

„Tida, itoelah tida bisa!” ia kata kamoedian.”
Mana bisa akoe pantang minoem arak, sedeng
itoe minoeman ada akoe-poenja kasoekaän jang
teroetama? Tapi boeat tetepken kae-
poenja pikiran, biarlah akoe minoem koerangan
sedikit, jaitoe tiada nanti minoem poela seperti
biasa.”

„Baek, akoe soeka menoeroet kaloe begitoe,”
kata Soei Yong, sekalipoen dalem hatinja masi
tiada merasa enak, kerna ia-poenja maoe adalah
itoe orang toea pantang minoem arak sama-sekali.

Begitoelah Tjoa Boe laloe soeroe orang pergi
tjari praoe sewaän jang aken dipake brangkat ka
Ouw-kong, sedeng pada istrinja ia soeroe bikin
persediaän segala barang jang perloe dibawa.

Doea hari berselang dari dibikin persediaän,
kita liat Tjoa Boe serta familienja soeda ada
dalem praoe jang brangkat menoedjoe ka Ouw-
kong, samentara ia-poenja roema ada dipertjajaken
atas pendjagaännja satoe boedjang jang dipertjaja.

Itoe praoe sewaän ada djadi kapoenjaännja
Tan Siauw Soe, saorang asal kota Hoij-an be-
roesia kira-kira tiga-poeloe taon. Ia ini boekan ada
satoe toekang praoe jang djoedjoer, apalagi
ia-poenja toedjoe kawan semoea ada bangsa ba-
djingan, jaitoe Pek Lie Hie Tjoe, Sim Tiat
Siang, Lie Siauw Ho Ban Tjoe, le Hap

Pah dan Leng Poui Tjwe. Marika ini semoea boleh dibilang soeda perna kaloe ar masoek dalem pemboeian lantaran lakoeken roepa-roepa parkerdjaän, tapi jang teroetama ia-orang pande lakoeken parkerdjaän membadjak sebagaimana pada permoela kali kita telah ketemoeken marika sebagi anak praoe sewaän.

Ini toedjoe kawan ada bertaloek pada Tan Siau w Soe, lantaran itoe eigenaar praoe taoe betoel marika-poenja keadaän dan sembarang waktoe marika bisa didjeblosken dalem pemboeian atas kahendaknja Tan Siau w Soe, sebaliknya itoe eigenaar tiada bisa bikin satoe apa, kerna maski betoel ia perna lakoeken roepa-roepa kedjahatan, toch soeker aken orang bisa dapetken boektinja.

Demikianlah ada jang mendjadi sebab mengapa marika djadi menoeroet betoel pada itoe eigenaar praoe, maski djoega tiada kala pada Tan Siau w Soe dalem segala apa, apapoela pri-hal berklai.

Sedari Tjoa Boe sewa praoenja, Tan Siau w Soe soeda bikin perdamaian pada kawan-kawannja bahoea ia hendak rampok itoe pembesar, kahendak mana telah dinjatakan setoedjoe, tjoema sampe sabegitoe djaoe marika belon berani sembarangan toeroen tangan. Ia-orang ada mengatahoei sampe baek bahoea Tjoa Boe ada satoe ambtenaar militair jang tinggi dalem ilmoe sipoenjai kepandean

Begitoelah marika-poenja niatan masi dikan-
doeng sadja.

Satoe hal perloe dibilang, Tan Siauw Soe
boekan tjoema hendak arah itoe oewang dan
barang perhiasan jang tentoe ada berdjoembla
besar sebagaimana jang'ada dipikir oleh kawan-
nja, hanja ia ingin djoega pada dirinja Tjoa Soei
Yong, kerna paras jang tjantik dari ini nona ada
menarik betoel ia-poenja hati. Ia pikir begimana
senang adanja apabila berbareng dengan dida-
petnja itoe kekajaän, ia djadi dapet djoega satoe
istri jang begitoe eilok.

Pada soeatoe hari itoe praoc telah sampe di
Hong-tjioe, dimana Tan Siauw Soe soeda djan-
djiken kawan-kawannja aken toeroen tangan,
tapi ia pesen djoega orang moesti berlakoe ati-ati,
sebab Tjoa Boe boekan ada saorang jang boleh
dipandang enteng. Betoel marika semoea bisa
silat, tapi toch belon tentoe sanggoep tempoer
itoe Yoe Kek jang baroe di-benoemd.

Tatkala tjoeatja soeda moelai gelap di sana
sini, dengen pelahan Tan Siauw Soe kasi djalan
praoenja di satoe bagian soengei jang paling
soenji, kerna itoelah ada tempat jang ia maoe
goenaken sebagi lapangan dari kedjahatannja. Ia
telah kasi djalan praoenja begitoe pelahan, hingga
tiada ada satoe or Tjoa Boe jang dapet
taoe bahoea praoc i ekan lagi berlaboe.

Djoega Tjoa Boe sendiri jang getap tiada dapet taoe, lantaran itoe waktoe djoetsroe ia soeda moelai sinting dan masi teroes minoem arak bersama istrinja, perboeatan siapa ada di pandang dengan hati doeka oleh Soei Yong.

Itoe tempat sepi Tan Siauw Soe laloe pantjer djangkarnja, kamoedian dengan berbareng bersama toedjoe kawannja ia menjerang ka dalem praoe. Satoe boedjang jang marika ketemoeken paling doeloe laloe dirampas djiwanja dengan paksa, lantaran mana membikin Tjoa Boe dapet taoe, bahoea dalem praoenja itoe ada kedjadian perkara besar.

Dengen badan limboeng ini Ijoe Kek bangoen berdiri dan laloe bentak pada itoe kawanannya badjak, tapi seblonnja ia bisa berboeat satoe apa, ia soeda dibikin roeboeh oleh marika. Dan lantaran binasanja itoe, maka laen-laen orang dalem praoe laloe pada minta ampoen, teroetama orang-orang prempean jang tiada mempoenjai goena.

„Soedara-soedara, lekaslah blenggoe pada marika!” Tan Siauw Soe berseroeh pada kawanannya, tapi berbareng dengan itoe ia laloe hampirken Tjoa Soei Yong.

Ini gadis dapet taoe dirinja tentoe bakal dibikin tjilaka, maka ia tjepe dan lompat ka dalem soengei tapi maksoed itoe bisa disampeken, Tan Si Soe soeda keboero

djambret padanja dan kamoedian di peloek.

Samentara itoe semoea orang jang diblenggoe telah dilempar ka dalem soengei, hingga tiada ada satoe jang bisa katoeloengan djiwanja. Orang dalem itoe praoe melaenken Tjoa Soei Yong sadja jang idoep.

Ini gadis laloe memaki kalang-kaboet pada Tan Siauw Soe dan kawan-kawannja sambil goenaken tangan memoekoel orang jang dipegang, tapi poekoelan itoe tiada diladenin oleh itoe kapala badjak. Tjoa Soei Yong poen belon perna beladjar ilmoe silat, padahal ajahnja ada pande sekali dalem itoe kepandean.

Pek Boan dan jang laen-laen djadi tiada senang atas perboeatannja Tjoa Soei Yong, marika hendak lantes binasaken ini gadis, tapi Tan Siauw Soe menjegah sambil minta orang pandang padanja.

„Besok akoe nanti atoeer begimana baeknja boeat koe poenja kebaekan,” demikian ada djandjinja ini kapala badjak pada semoea kawannja.

Itoe waktoe djoega praoe terseboet dikasi berlaloe djaoe dari itoe tempat, kerna marika koeatir perboeatannja itoe dapet diketahoei oleh laen orang atawa pembesar negri. Sasoedanja dilepas djangkar, baroe Pek Boan kapalaken, semoea itoe pendapetan lantes d... lagi.

„Begitoe djoega ... kata Tan Siauw Soei, Tapi akoe rasa b... kali bila dibagi-bag.

besok, lantaran ini hari djoestroe ada tanggal lima-belas, apa tiada baik bila akoe bikin hari girang doeloe, sedeng kae-orang poen bisa toeroet bersenang-senang, akoe kira besok djoega belon laot."

Semoea kawan itoe njataken moefakat, maka ia-orang lantes atoe medja makan bekas Tjoa Boe serta boeka bebrapa gendoel arak jang paling bagoes. Begitoelah ia-orang bersenang-senang sedeng Tjoa Soei Yong di koeroeng di blakang.

Sasoedanja minoem tjoekoe Tan Siauw Soe antes masoek ka dalem praoe, dimana ia dapetken Tjoa Soei Yong masi menangis teroes lantaran pikirin nasibnja. Siga ia hampirken dan hiboer dengan roepa-roepa boedjoekan hingga itoe nona bisa brenti menangis.

Meliat begitoe ini kapala badjak djadi sange girang, apalagi itoe waktoe djoega Tjoa Soei Yong laloe njataken soeka menoeroet ia-poen kahendak, pernjataän mana telah diboektiken.

Sasoenggoenja djoega itoe waktoe Tjoa Soei Yong telah seraken dirinja seraja toeroet sasoeatoe kahendaknja Tan Siauw Soe, kene tipoen apa jang hendak diperboeat ada melaw sama kainginan hatinja.

Apatah jang moeatehken gadisnja Tjoa Soe soeka serahken di tangan der pikir perboeatar

itoe ada memboesoekin sanget ia-poenja badan serta djoega namanja ia-poenja familie? Kena-pakah ia, sebagai satoe gadis jang terhormat tiada bisa korbanken diri aken goenanja ia-poenja kahormatan? Tjoa Soei Yong mengarti, kasoetjian diri ada melebiken dari segala apa bagi saorang prempoean, apa lagi jang ternama gadis, sasoe-danja taoe itoe, mengapa dan ia maoe djoega lakoeken itoe? Inilah kita kira ada pertanjaän-pertanjaän jang tentoe aken dimadjoeken oleh sasoeatoe pembatja, maka di sini ada baik djoega oila kita membri sedikit ketrangan.

Memang djoega Tjoa Soei Yong mengarti sampe aek apa jang ia lakoeken, tapi toch ia soeda erboeat djoega begitoe, lantaran ia telah pikir, da ada goenanja ia berkepala batoe dengan egang kahormatan dan kasoetjian. Pertama me-ang ia pikir hendak berkeras, tapi kamoedian boewang kesamping itoe pikiran kliroe. Ia eda doega pasti, djikaloe ia tiada maoe me-eroet, tentoe Tan Siauw Soe aken binasaken poenja djiwa, tjara begitoe ia djadi menangoeng ja lebi besar, sebab sakit hati dari kadoea ng toeanja tiada ada orang jang bales, sedeng djadian itoe diketahoei meloeloe oleh ia sendiri tiada oleh laen orang. Dan taro betoel ada orang jang dapet [redacted] tapi apatah orang nanti kasoedian a [redacted] keras boeat bikin

pembalasan atas sakit hatinja itoe? Demikianlah, mengapa ia soeda soeka korbanken dirinja.

Begitoelah Tan Siauw Soe soeda tidoer dengan njenjek di itoe malem, kerna berbareng dengan didapetnja harta jang besar kapoenjaännja familie Tjoa, djoega ia dapetken dirinja orang poenja Tjian-kim Sio-tjia.

Sedeng Tan Siauw Soe rasaken itoe koetika jang paling senang brangkali selama idoepnja adalah ia-poenja semoea kawan masi makan-mi noem teroes-teroesan. Marika sama sekali tiada merasa mengirih jang itoe Toako soeda dape nona manis, malah ia-orang njataken girangnja atas itoe.

Satoe diantara marika jang oesianja palin toea, jalah Pek Boan, koenjoeng-koenjoeng tela berkata pada sekalian soedaranja itoe.

„Soedara-soedara jang terhormat!” demiki ia moelai. „Sebagimana kae-orang tentoe ket hoei, membabat poehoen moesti dengan akarn dari itoe, berhoeboeng dengan apa jang dip boeat ini hari kita djadi perloe goenaken i pepata. Sekarang betoel itoe gadis mae toer kahendaknja Tan Toako, tapi kita tiada da taoe begimana adanja ia-poenja hati jang se ti, hingga kita tiada dapet taoe djoega jang kamoedian ia - ten berboeat. Itoe se djoestroe sekarang date masi tidoer, baik

bagi-bagi ini harta jang didapet dan lantas tinggalkan padanja, dengen begini kita bisa loepoetken diri dari bahaya jang mengantjem apabila kamoesdian betoel-betoel ini perkara djato di dalem tangannja politie atas perboeatannja itoe gadis. Tjobalah kaeoe pikir, apa bisa djadi ia mae bikin tertjemar kahormatannja sedeng itoe ada ditjemarken oleh ia-poenja moesoe besar, jang membikin binasa ia-poenja kadoea orang toea dan loedes harta bandanja?"

Semoea kawan itoe pada tinggal diam, seperti djoega marika mae pikir mateng apa jang dibilang oleh Pek Boan. Keadaän di sitoe djadi soenji sekali.

Sasoedanja itoe kasoenjian berdjalan lama djoega, baroelah dengen berbareng marika njaken moefaket hal jang mana soeda bikin Pek Boan djadi sanget girang.

Sigra djoega ia-orang babenah dengen kasak-pesoek, kerna koeatir perboeatannja itoe nanti pet diketahoei oleh Tan Siauw Soe, sasoedanja itoe ia-orang tjepet singkirken diri. Masing-masing laloe bawa djalannja sendiri dan ada djoega jang berkoempoel berdoea atawa bertiga. Berbareng dengen itoe keadaän djadi soenji kali malah lebi soenji daripada jang tadi, kerna tarang orang tiada bisa denger sekalipoen karna napas, katjocali menggerosnja Tan Siauw Soe dan Tjoa Soe.

Pada besoknja sampe mata-hari soeda naek tinggi baroe Tan Siauw Soe mendoesin dengen hati moenga, tapi sasoedanja ia djalan kedepan dalem praoenja ia djadi kaget boekan maen kerna ia tiada dapetken ada satoe soedarahnja. Sasoeda mentjari oebek-oebekan di sitoe-sitoe djoega dan tiada bisa ketemoe, baroe Tan Siauw Soe mengarti, apa jang itoe toedjoe kawan soeda lakoeken.

„Sasoedanja marika melariken diri, tapi akoe tinggal begini sadja, itoelah berarti menantiken datengnja bahaja,” Tan Siauw Soe pikir dalem hatinja. „Dalem keadaän sekarang akoe tiada boleh toengkoelin Soei Yong djikaloe akoe tiada maoe dapet tjilaka, lantaran itoe baeklah akoe berboeat begini.....”

Dengen tiada teroesken itoe perkataän jang paling achir Tan Siauw Soe sembat satoe tambang dan djalan masoek ka dalem praoe, dimana ia hampirken Tjoa Soei Yong lagi doedoek terpekoer dan tiada dapet taoe ini kapala badjak dateng mendeketin.

Koetika soeda dateng dek Dan kali baroe ia

menengok, tapi itoe waktoe soeda kasep, kerna sigra djoega itoe tambang jang dipegang oleh itoe „soemi” telah mendjiret di lehernja serta ditarik dengan kentjeng.

Kasoedahannja Tjoa Soei Yong djato di dasar prae dengan badan berkredjetan.

Itoe semoea Tan Siauw Soe lakoeken dengan hati adem dan pandang badannja Tjoa Soei Yong dengan paras moeka tiada beroba, dari apa mendjadi njata bahoea ia ada saorang kedjem jang bisa lakoeken perboeatan-perboeatan jang meliat pada tangannja Allah.

Dengen mendoega itoe „istri” satoe maleman soeda poetoes djiwa, dengan sendirian Tan Siauw Soe lompat ka dalem soengei dan bernang me-noedjoe ka pelaboean, dari mana ia lantes maboer setaoe kamana.

Apa bener-bener Tjoa Soei Yong telah poetoes djiwa?

Tiada, ini gadis jang ada mempoenjai pikiran pandjang tiada meninggal doenia, kerna Allah masi pajoengin padanja. Betoel itoe tambang telah mendjiret lehernja dengan kentjeng, tapi blakangan telah djadi kendor tatkala dilepas oleh Tan Siauw Soe, lantaran mana ia djadi dapet koetika boea tarik hawa oedara seger.

Begitoelah —kelamaän ia djadi dapet napas tjoeoep. badan lemah ia bangoen ber-

diri, kamoedian doedoek di atas pembaringan dengan hati sakit. Tapi apakah ia bisa berboeat kerna perkara soeda berdjalan begitoe djaoe? Sekarang ia tjoema bisa koetjoerken aer mata serta menangis segak-segoek.

Samingkin lama ia pikir, semingkin besar adanja ia-poenja sakit hati. Sebab, pertama kedoea orang toanja dibikin binasa dalem tjara jang kedjem, ka-doea ia sendiri poenja kasoetjian diri dibikin tjemar dan ka-tiga, djiwanja hendak dirampas dengan boewas dan achirnja dirinja ditinggal sendirian dalem itoe praoe. Abis sama siapa sekarang ia bisa toempangin diri?

Achirnja, kerna tiada dapet taoe begimana moesti berboeat dan merasa begitoe sakit hati, ia djadi menangis menggeroeng-geroeng, tjara begitoe baroe ia bisa bikin hatinja djadi legahan.

Brapa lama ia berada dalem itoe keadaän ia sendiri tiada dapet taoe, koetika sekoenjoeng-koenjoeng ia denger soeara riboet-riboet di loear praoe, hingga hatinja djadi terkedjoet dan doega, djangan-djangan bakal ngalamken laen kasoekerran. Ia doega, tentoelah soeara riboet-riboet itoe ada diterbitken oleh laen kawanan badjak.

Sekarang ia menoenggoe daternja bahaja dengan hati jang tiada tetep. Dan lantaran itoe djoega, ia djadi tiada berdjaja oempetken diri, sedeng boeat boewang diri ka dalem soenggoe

itoe ia tiada aken berboeat, kerna dengan begitoe berarti ia tiada teroesken bikin pembalesan.

Ia tjoema doedoek sambil toendoekin kapala. Soeara riboet itoe semingkin lama djadi semingkin deket, hingga ia denger bebrapa banjak tindakan kaki masoek ka dalem kamarnja itoe, samentara ini perkataan ada kadengeran beroelang-oelang: „He, pembesar jang manatah ini telah dibadjak?”

Mendenger begitoe Tjoa Soei Yong taoe dirinja boekan sedeng berhadapan dengan orang djahat, maka ia laloe angkat kapalanja memandang pada marika itoe.

„Siapatah kae, Siotjia? Dan apatah jang telah kedjadian?” Satoe orang menanja dengan roepa menjataken kesian, orang mana ia liat ada berparas tiada djelek, apalagi itoe waktoe ia itoe kliatannja ada sanget gaga. Pakeannja poen kliatan ada sanget pantes.

Soei Yong tiada bisa djawab pertanjaan itoe, ia-poenja kasedian ada menindi betoel hatinja. Ia hanja tjoema bisa tekoek loetoet di hadepannya orang itoe sambil menangis tersedoe-sedoe.

„Djangan, djanganlah kae menangis, Siotjia,” itoe orang berkata poela. „Tapi akoe minta, soekalah kae tjeritaken padakoe apa jang kedjadian di sini, brangkali sadja akoe bisa membri
... ana-apa, lebi lagi djikaloe akoe

ada itoe kahormatan aken membri pertoeeloengan kaloe kae soedi trima. Padakoe kae boleh taro kapertjajaän, sekalipoen kita-orang baroe perna ketemoe ini sekali."

Tjoa Soei Yong dengerin itoe perkataän sambil menangis teroes, kamoedian dengan soesa ia bisa toetoerken djoega apa jang telah kedjadian. Achirnja ia minta, bila itoe orang tiada boeat kebratan aken soeka toeloeng wartaken itoe pada pembesar negri, soepaja ia bisa dapet keadilan. Tapi ia terangin djoega, tjoema sajang ia tida bisa bales orang itoe poenja boedi, hanja inget sadja dalem hatinja.

„Tentoe akoe soeka membri pertoeeloengan, Sio-tjia," kata itoe orang. „Perkara boedi kae tiada oesah seboet satoe apa, kerna akoe poen boekan mae membri pertoeeloengan lantaran ingin mendapet balesan, hanja melaenken ada boeat melakoeken kewadjiban sesama menoesia, jang haroes menoeloeng satoe sama laen....."

„Ja, tapi toch akoe ada beroetang boedi pada êngko," kata Tjoa Soei Yong sembari membri hormat.

„Soeda, kae bangoenlah, Sio-tjia," kata itoe orang, kamoedian ia minta soepaja itoe gadis soeka toeroet padanja, permintaän mana telah ditrima.

Begitoelah Tjoa Soei Yong

itoe praoe dimana ia ngalamken itoe kedjadian atas dirinja dan toeroet pada itoe orang ka ia-poenja praoe.

Siapatah adanja itoe orang, jang soeka membri pertoeoengan pada Tjoa Soei Yong dan bitjaranja ada begitoe manis ?

Ia ada saorang she Pian nama Hok asal dari Han-yang. Ia ada saorang hartawan di tempatnja dan ia-poenja kekajaän itoe djadi bertamba lantaran ia ada berniaga besar.

Ia sabetoelnja boekan ada saorang baik-baik, hanja moeloetnja sadja jang manis, kerna ia-poenja pertoeoengan itoe boekan ada dengan sewadjaranja, hanja adalah boeat dapetin dirinja Soei Yong, jang ia penoedjoe betoel. Ini djadi lebi njata, sebab ia tiada kasi kabar satoe apa pada pembesar negri tentang itoe, menoeroet seperti apa jang diminta oleh gadisnja Tjoa Boe al-marhoem.

Di itoe praoe dimana ia adjak Tjoa Soei Yong tinggal tiada ada laen kamar, hanja tjoema kamar a sendiri. Ini kamar ia kasi itoe gadis pake se-iraja bilang, boeat ia sendiri boleh tidoer di loear, dengan perboeatannja jang mana ia djadi semingkin menarik orang poenja hati.

Tjoa Soei Yong poen ada saorang djoedjoer jang mengenal boedi.

Memang djoega soeda djadi loemrahnja jang satoe orang biasanja tiada bisa tahan sabab begitoelah telah terdjadi di itoe malem, kernian Pian Hok laloe masoek ka dalem kamarnja dan ketemoeken itoe nona jang ditoeloeng, kedatengar siapa telah ditrima dengan baik.

„Ada oeroesan apakah ingko dateng padakoe begini waktoe?” Tjoa Soei Yong menanja sambil silaken itoe toean penoeloeng mengambil tempat doedoek.

Pian Hok lantes berdoedoek. Sedikit sa'at dengan roepa sangsi dan dengan soera plahan ia kata: „Ada satoe oeroesan jang perloe dibitjaraken pada kae, nona, melaenken lebi doeloek akoe hendak minta kae-poenja ma'af, manakala pembitjaraan itoe ada koerang menjenangkan hatimoe, brangkali. . . .”

„Bitjaralah, kata Tjoa Soei Yong. „Djikaloe apa jang aken dibitjaraken ada mempoenjai kapentingan tentoe sekali akoe soeka denger, sebaliknya kaloe oeroesan jang tiada ada djoentroengannja, akoe harep lebi baik ingko djangan omongi.”

„Tentoe sadja ada perkara pantes jang akoe hendak bitjaraken,” djawab Pian Hok. „Apakah kae soeka membri ma'af?”

„Baek,” sauet Tjoa Soei Yong. Nah, moelailah!”

„Beginilah ada oeroesan jang akoe hendak bitjaraken,” Pian Hok moelai. „Sebagaimana kae

taoe, ini perkara akoe soeda seraken pada pem-
besar negri, maka ada harepan aken itoe perkara
bisa lekas di preksa. Tapi samentara itoe tempo
jang belon tentoe, apa tiada baik kae
sajda padakoe, soepaja akoe bisa membri per-
toeloengan di sembarang waktoe? Tjara begini
djadi kae tiada aken tersia-sia selama menan-
tiken itoe papreksahan jang belon katentoean.
Akoe harep kae nanti soeka njataken moefa-
ket.”

Soei Yong djadi bengong awasin itoe toean
penoeloeng. Sembari berboeat begitoe hatinja ada
berpikir keras sekali, kerna ia pikir, tiada ada
halangannja aken ia boesoekin teroes dirinja jang
soeda dibikin tertjemar oleh itoe badjak laoet,
sedeng kaloe pambalessan sakit hati soeda di
lakoeken, ia boleh pikir poela begimana haroes
ambil tindakan.

„Keadaänkoe jang begini soeker membikin akoe
soeker menoelek kainginanmoe,” ia djawab ka-
moedian. „Tjoema, boeat sampeken niatankoe,
akoe harep kae nanti boektiken perkataanmoe
dengan soempa, jang kae tiada aken sia-sia
dirikoe ini, kaloe tida, biar begimana poen akoe
tiada bisa trima. Djoega kae moesti inget, jang
dirimoe ada diwadajibken aken membikin pamba-
lessan atas apa jang terdjadi atas dirikoe dan
seantero familie!”

Sebagai seorang yang tiada bisa tahan sabar, sigra djoega Pian Hok tekoek loetoetnja di itoe praoe, sambil meliat ka atas dan bersabda dengan soeara tetep: Allah jang mendjadi saksi, apabila kamoedian akoe tiada kerdjaken kewadjabankoe bikin pembalesan atas penasarannja Tjoa Soei Yong, akoe-poenja istri, biarlah kamoedian akoe binasa tertjemploeng kadalem soengei!"

Seabis kata begitoe ia laloe bangoen kombali.

Tjoa Soei Yong trima padanja dengan hati bersoekoer.

Sigra djoega Pian Hok prentah madjoeken kandarannja sampe disatoe pinggir daratan jang rame, dimana ia beli segala roepa barang makanan.

Boekan ia sendiri sadja bersama istrinja jang baroe dapet kasengan di itoe malem, hanja djoega semoea boedjangnja, kerna memang biasanja ia ada berlakoe loear biasa bila lagi bikin pesta, baik ketjil maepoen festa besar.

Maski itoe pesta dibikin di waktoe malem, toch dengan mendadak orang soeda kerdjaken dengan soenggoe-soenggoe. Lantaran itoe ia-orang djadi bisa sediaken makanan dengan tjoekoep.

Itoe praoe kamoedian didjalanken teroes, kerna Pian Hok ingin lekas sampe di roemanja, tapi samentara itoe ia bikin senang-senang teroes bersama Tjoa Soei Yong dan baroe masoek tidoer tatkala hari soeda djae malem.

Pendek bisa dibilang, sasoedanja berkandaran aer liwat bebrapa hari, selama mana ia rasaken kasenangan, satoe hari sampelah Pian Hok di pelaboean Han-kouw.

Ini soedagar sabetoelnja soeda mempoenja istri, pada istri mana ia ada sanget takoet lantaran ini njonja roema ada sanget bengis, itoe sebab ia djadi tiada berani bawa ini istri jang baroe poelang ka roemanja, hanja laloe tjari-in roema laen. Sasoedanja baroe ia berdjalan poelang dengan senang.

Sampe bebrapa lama ia bisa rasaken kasenangan, tapi kelakoeannja itoe jang berbedah, apapoela bila kaloe ar tiada ada seperti biasanja, jang kebanyakan selaloe poelang laot, baik siang maoepoen malem, istrinja itoe djadi tjemboeroean. Blakangan ini istrinja telah dapet tjoem bae nja djoega, hingga achir² dengan gampang ia dapet taoe di mana goendiknja sang soemi ada ditaro.

Ini istri jang tjerdik tiada djadi mara, maski hatinja ada sanget menggerodok atas perboeatannya itoe soemi; djoega ia tiada maoe bikin riboet-riboet, kerna perboeatan tjara begitoe ada berarti bikin petja resia dalem kalangan familie sendiri, dari itoe ia laloe tjari akal.

Bebrapa banjak akal ia soeda dapetin, tapi tiada ada satoe jang boleh digoenaken, katjoeali mendapetannja jang paling achir, ja-itoe tipoe

itoe goendik dari soeaminja dan kamoedian di djoel pada orang laen, apalagi pakerdjaän itoe ada gampang sekali aken dilakoeken.

Begitoe ia lantes tjari satoe tengkoelak menoesia, tengkoelak mana bisa lantes didapetken. Harga pendjoealan lantes dibikin dan dibajar contant, kerna orang pertjaja pada njonja Pian, siapa laloe djandjiken itoe tengkoelak boleh ambil itoe „makanan” pada hari jang ia telah tentoeken. Djalannja hari ada sanget tjepet, sabentaran sadja telah sampe.

Di itoe hari pagi-pagi dengan menggoenaken alesan bagoes, beroentoeng njonja Pian bisa bikin soeaminja mabok arak sampe loepa daratan, lantaran mana ia djadi bisa koeroeng Pian Hok didalem kamar jang pintoenja ia koentji dari loear. Sasoeda itoe, baroe bersama-sama tengkoelak jang dimaksoed ia pergi ka roemanja Tjoa Soei Yong seraja bawa satoe djoli jang indah.

Koetika ketemoe pada Soei Yong, sembari tertawa dengan kelakoean manis, njonja Pian akoeh dengan sabenernja bahoea ia ada istrinja Pian Hok, hingga gadisnja Tjoa Boe djadi terperandjat boeat pertama kali.

„Djangan kaget, soedarakoe, kae djangan takoet padakoe, „kata njonja Pian. „Akoeh dateng kamari boekan dengan maksoed tiada baek, hanja akoeh hendak samboet padamoe, jang telah di

tinggal terpisa di ini roema. Marilah kaeo ikoet akoe poelang, di mana kita boleh tinggal sama-sama dan rawat kita-poenja soeami dengan baik."

Lebi djaoe ia ini kaloearken roepa-roepa boedjoekan.

Tjoa Soei Yong, satoe gadis djoedjoer jang belon kenjang makan garem doenia telah pertjaja itoe obrolan, apalagi ia liat kelakoean jang manis dari njonja Pian Hok, maka ia pertjaja sadja. Begitoelah ia laloe njataken setoedjoe.

"Sekarang kaeo boengkoeslah semoea barang jang perloe dibawa, soepaja ini roema bisa di kosongin dengen lantes," kata njonja Pian Hok kamoedian. "Dan hajolah kita lekas berangkat, djoli poen soeda menoenngoe di loear."

Soei Yong toeroet sadja apa jang perloe di bawa barang-barang mana ia seraken di tangannja itoe njonja.

Sabentar kamoedian ia-orang soeda doedoek djoli

Lantaran tiada dapet meliat ka loear Soei Yong djadi tiada dapet taoe ia ka mana orang soeda bawa padanja, hanja ia taoe-taoe sasoedanja toeroen dari djoli dan orang adjak ia naek ka dalem satoe praoe jang sedeng berlaboe. Berbareng dengen itoe ia tiada dapet liat pada njonja Pian, maka lantes djoega ia dapet taoe, apa jang orang soeda lakoeken atas dirinja.

„Oh, kaloe begitoe orang soeda sesatkan pada-koe,” ia kata kamoedian dengan sakit, dan berbareng dengan itoe ia lantes lari ka pinggir prae aken terdjoenken diri ka dalem aer, tapi sajang maksoednja itoe tiada kesampean, lantaran orang soeda keboeroe pegang padanja dan dibawa kombali ka dalem prae.

Sembari prentah djoeroemoedi djalanin itoe prae, itoe tengkoelak menoesia laloe oendjoek kepandeannja memboedjoek, kerna dengan perboeatannja itoe ia harep Tjoa Soei Yong bisa di bikin djinek.

Tjoa Soei Yong tiada perdoeliken orang poenja boedjoekan, hanja laloe menangis, malah selaloe berontak-rontak aken lolosken diri dari tjekelan.

Itoe waktoe ia telah berpikir keras aken abisken djiwanja dengan djalan minoem aer banjak-banjak, tapi sama sekali ia tiada pikir ada itoe niatan besar, boeat membales sakit hati atas penasaran dari koelawarganja.

Begimana besar dan girang ada hatinja njonja Pian Hok, kerna ia soeda bisa singkirken soeaminja poenja istri piaraän, itoelah orang bisa bajangken sendiri.

Dengen membawa semoea barang-barang jang mendjadi kapoenjaännja Soei Yong ia berdjalan poelang dengan paras berseri-seri, tapi tatkala sampe di roema ia djadi sanget goesar. Soeaminja

jang sedeng tidoer njenjek ia kasi bangoen seraja dipoekoelin, tentoe sadja poekoelan itoe tida di rasaken oleh Pian Hok, jang tiada mengarti kenapa istrinja boleh berlakoe begitoe roepa, satoe kelakoean jang tjoema bisa dilakoeken oleh orang edan. Tapi blakangan ia baroe mengarti, sasoeda denger betoel makiannja itoe istri jang ada seboet-seboet nama istri piaraännja.

„Tjilakalah kaloe begini,” kata Pian Hok sambi bengong-terlongong-longong. Ia pikir kliwat sa-l jang bila Soei Yong moesti didjoeal pada orang laen, sedeng ia belon merasakan poewas bikin senang-senang pada itoe orang baroe. „Ach!” demikianlah ada oetjapan satoe-satoenja jang bisa kaloear dari moeloetnja.

Lantaran ia selaloe ada berpikir begitoe, ia djadi tiada rasaken bahoera istrinja telah geboekin badannja dengan tangan sambil mendamprat kalang-kaboet. Ia baroe djadi sedar tatkala rasanja satoe tjoebitan dari itoe istri sampe di bagian anggotanja jang biasa diseboet paha moeda. Ia djadi berdjingkrak-djingkrak dan berlaloe dari kamar.

Begitoelah bebrapa hari berselang dari kedjadian di atas, keadaännja Pian Hok ada loear biasa sekali. Ia selaloe kliatan djadi soesa hati, dari apa menandakan, maski bener ia ada satoe Kong-tjoe idoeng poeti jang biasa sia-siaken orang

prempoean dengan piara stenga djalan, tapi pikirannja itoe jang tiada bagoes telah djadi beroba koetika ia piara Tjoa Soei Yong. Setaoe begimana, ia djadi tiada tegah aken bikin soesa itoe nona jang bernasib malang.

Samentara ia ada berkeadaän begitoe roepa, adalah ia-poenja istri jang saban saät merasa senang, kerna sekarang ia tiada dapet rongrongan lagi. Ia senang sekali soeaminja bisa djinek di roema, sekalipoen soemi itoe tiada maoe open padanja hanja djengkel selaloe.

Blakangan, lantaran tiada penoeken djandjinja, betoel-betoel telah kedjadian jang Pian Hok telah habiskan djiwanja di dalem aer. Hingga ia djadi makan soempanja sendiri.

Njonja Pian djoega, sedari soeaminja menoe-toep mata telah djadi tiada betoel, kerna ia laloe bikin perhoeboengan resia sama segala orang tiada karoengan, hingga ia telah bikin loedes semoea harta peninggalan dari soeaminja jang mempoenjai kekajaän tjoekoep. Ia djadi bernasib begitoe malang, lantaran orang anggep ia terlaloe koerang adjar pada soeaminja, sedeng dari doeloe memang tiada dilarang aken saorang lelaki piara bebrapa istri atawa goendik, asal sadja soemi itoe ada mempoenja kakoeatan boeat memiara.

Achirnja njonja Pian djadi boenga rajah jang bernasib boeroek.

Hatta Tjoa Soei Yong kena di tengkoelakin, sebagaimana kita taoe, permoela ia telah ambil pikiran pendek, jaitoe hendak terdjoenken diri ka dalem soengei. Tapi pikiran itoe kamoedian ia batakken, kerna mendadak ia inget poela tentang itoe sakit hati jang ia belon dapet bales. Itoe sebab ia djadi menoeroet sadja apa jang itoe tengkoelak aken lakoeken atas dirinja.

Itoe tengkoelak ternjata djoega ada setan paras eilok, di satoe malem soeda hendak ganggoe orang poenja kahormatan, tapi biar begimana djoega Tjoa Soei Yong tiada maoe menoeroet, malah ia antjem aken bertreak minta toeloeng kaloe orang maoe lakoeken paksaän, lantaran mana ia djadi bisa loepoetken diri dari kaboeroekannja itoe iblis menoesia.

Gak Hoe, namanja itoe tengkoelak, djadi tiada senang niatannja tiada kesampean, maka ia laloe bitjaraken hal itoe pada satoe kawannja. Ia tanja, begimana ada pikirannja itoe kawan bila ia paksa Soei Yong toeroet kahendaknja.

„Memang djoega pantes kae berboeat begitoe padanja,” kata itoe kawan jang sama kedjinja „Tapi djikaloe ia menoelak sempe begitoe roepa lebi baek djangan dipaksa teroes, kerna itoe bisa meroesakin kita-poenja pakerdjaän jang soeda berdjalan begitoe lama. Menoeroet pikirankoe manakala di ini praee ia tiada maoe trima teta-

moe, baek kita bawa ka laen tempat boeat djoel kombali padanja. Dengan begini, boekan sadja kita tiada aken mendjadi roegi tiada karoean, poen kita djadi sekalian singkirken bahaja bagi pengidoepan kita."

"Baek, akoe nanti toeroet pikiranmoe." kata Gak Hoe, kamoedian ia kasi prentah pada toekang praoe, soepaja praoe itoe bisa ditoedjoeken ka Boe-tjiang.

Tiada selang lama ia-orang telah sampe di kota Boe-tjiang, di mana dengan gampang Tjoa Soe Yong telah didjoel pada satoe roema hina jang terkenal, hal jang mana soeda bikin ini gadis djadi semingkin soesa hati.

Di ini roema hina djoega Tjoa Soei Yong bawa adatnja jang membatoe, jaitoe tiada maoe trima tetamoe, baek siapa djoega, hingga jang mendjadi eigenaar djadi sanget djengkel. Begitoelah ia laloe djoel kombali ini nona pada saorang dari kota Tjiauw-hin, Ouw Hoat namanja

Ouw Hoat sabenernja ada setan paras eilok. Kerna ia tinggal menoempang di sebla itoe roema hina, djadi ia perna liat begimana ada parasnja Tjoa Soei Yong. Sabegitoe lama ia naksir, tapi kainginan itoe belon bisa disampeken, lantaran Soei Yong tiada maoe trima tetamoe.

Eigenaar dari itoe roema hina poen taoe Ouw

Hoat penoedjoe betoel pada ia-poenja boenga baroe itoe, djadi satelah tetepken niatannja boeat djoeal kombali nona kita, sigra ia tanjaken itoe pada ini setan paras tjantik. Tentoe sadja Ouw Hoat samboet dengen tangan terboeka.

Demikianlah di satoe malem, di roema penginepannja Ouw Hoat soeda sediaken roepa-roepa barang hidangan, kerna sabentar ia aken djadi „kemanten baroe.”

Kira-kira djem 8 malem Soei Yong telah di anterken ka roemanja Ouw Hoat. Ia ini soeda maoe menoeroet orang perlakoeken begitoe atas dirinja, kerna kombali ia kena ditipoe. Taro tiada ditipoe poen tentoe ia aken menoeroet, kerna soeda merasa tiada senang tinggal di itoe roema hina, di mana ia-poenja kaboesoekan djadi semingkin bertamba.

Tatkala sampe di roemanja Ouw Hoat, ini setan iblis laloe samboet padanja dengen manis sekali, tapi penjamboetan itoe tjoema ditrima dengen soeara tangisan oleh nona kita.

Koetika tinggal berdoewaän sadja dalem kamar-nja, dengen roepa-roepa akal Ouw Hoat boedjoek soepaja itoe nona maoe toeroet kahendaknja. Ia bilang, apa sadja jang Soei Yong maoe ia nanti adaken atau lakoeken, asal ia-poenja kahendak bisa ditoeroet lebi doeloe.

Ia-poenja boedjoekan itoe tida memakan, malah

bebrapa kali ia kena di disemprot. Dan toeh itoe semprotan ia tiada ambil perdoeli, lantaran ia pikir orang prempoean poenja ambekan ada boeat sedikit waktoe, lama-kelamaän tentoe aken menoeroet djoega. Begitoelah ia lawan dengen tertawaän sadja semprotannja Tjoa Soei Yong.

„Lantaran tiada maoe trima tetamoe atas paksaännja itoe eigenaar, bebrapa kali akoe liat kae telah koetjoeri aer mata, nona,” kata Ouw Hoat dengen boedjoekannja jang aloes. „Meliat begitoe akoe djadi merasa sanget kesian padamoe, maka akoe telah berboeat begini roepa aken poenjakan dirimoe, kerna akoe pikir, brangkali kae lebi soeka ada jang piara daripada djoel diri setjara begitoe. Tapi sekarang, sasoeda kita djadi „soemi-istri”, kenapakah kae masi menangis sadja? Hajolah kita doedoek makan, sedeng barang hidangan akoe soeda sediaken. Akoe rasa, kae tentoe belon dahar di roemanja itoe.”

Ouw Hoat tiada teroesin perkataännja itoe, hanja ia laloe pegang dengen plahan tangannja Soei Yong seraja diangkat aken diadjak bangoen Tjoa Soei Yong poen lagi berdoedoek di pinggir pembaringan.

Soei Yong emposin itoe tangan, dan menangis teroes zonder membri penjaoetan, hingga Ouw Hoat djadi kewalahan. Ija berpikir, begimana ia

moesti boedjoek, soepaja bisa sampeken kahendaknja itoe.

„Diliat dari kaoe-poenja kelakoean ini, ternjata ada apa-apa jang membikin kaoe djadi sakit hati,” kata Ouw Hoat kamoedian dengan mendoega-doega. Tapi ia tiada njana sekali, perkataan itoe jang melaenken doegaän meloeloe telah bikin Soei Yong angkat kapala dan menoleh padanja.

„Hm, inilah ada koetika jang bagoes!” pikir Ouw Hoat dalem hatinja tatkala dapet liat gerak-gerakannya itoe bakal makanan, sigra djoega ia landjoetken: „Akoë doega pasti, nistjaja ada satoe hal jang membikin hatimoe djadi tergandjel, nona. Maka, kaloe soeka tjeritakenlah gandjelan itoe padakoë, brangkali sadja akoë bisa berboeat apa-apa aken goenamoe. Akoë nanti merasa begitoe senang apabila akoë bisa goenaken tenaga atawa oewangkoe boeat kaoe-poenja oeroesan. Nah, bilanglah padakoë, apa adanja itoe gandjelan. . . .”

Tjoa Soei Yong masi berdiam teroes.

„Bilanglah segala apa padakoë, nona, Ouw Hoat kata poelah boeat ka bebrapa kalinja. „Bilanglah kasoekeranmoe itoe padakoë, akoë berdjandji aken membri perteloengan jang berharga. Djoega, manakala dalem ini hal perloe ditarik tangannya politie, akoë nanti lanteslakoeken, kerna pembesar dari ini kota ada akoë-poenja

familie sendiri, hingga lantaran itoe tentoe ia aken perloeken bila akoe minta toeloeng padanja. Betoelkah kae ada mempoenjai kasoekeran heibat?"

Lagi-lagi Soei Yong angkat kapalanja memandang moekanja Ouw Hoat, dari mana ia ingin dapet taoe, perkataan itoe dioetjapken teroes sampe di hati atawa tjoema di moeloet sadja. Dan perboeatannja itoe menjataken, sekarang ia soeda taoe begimana keadaän di doenia. Ia poen soeda bebrapa kali kena diakali

Soei Yong pandang moekanja Ouw Hoat sampe lama, sedeng jang dipandang poen lantes bales mengawasin, hingga nona kita dapet banjak tempo boeat sampeken maksoednja. Ia dapet kenjataan jang Ouw Hoat telah bitjara dengan soenggoe-soenggoe padanja, maka tiada boewang tempo lagi ia laloe toetoerken tentang pengidoep-pannja jang tjilaka.

„Djikaloe kae bisa bikin pembalesan atas sakit hatikoe itoe,” kata Soei Yong kamoedian, „djangan kata baroe akoe didjadiken istrimoe, maskipoen didjadiken boedak poen akoe nanti merasa bersoekoer betoel. Lagipoen akoe me-laenken bisa bales boedimoe itoe dengan itoe djalan.”

„Kaloe begitoe kae ada toeroenan orang baek-baek jang mendapat soesa besar, kasian”, Ouw

Hoat kata dengan roepa doeka, menjataken ia perhatiken betoel orang poenja nasib. „Sekarang akoe toeloeng padamoe, istrikoel.” Pertama akoe nanti minta toeloeng sanakkoe itoe kaloearken soerat prentah boeat tangkep itoe sekalian badjak, kamoedian kita nanti pergi rapport ini pada pembesar di Hoay-an. Akoe harep, atas ketjakepannja orang-orng politie, dengan lekas kae poenja sakit hati ini nanti dibales.”

Mendenger itoe perkataän, bahna girangnja Tjoa Soei Yong djadi terharoe. Sibra ia berbangkit dan lepas kadoea loetoetnja di hadepannja Ouw Hoat. Seraja menangis sasenggoekan ia kata: „Djikaloe akoe bisa dapetken kae-poenja per-toeloengan, biar begimana djoega akoe nanti bales boedimoe itoe.”

Ouw Hoat tjepet pegang orang poenja tangan dan kasi Soei Yong bangoen, samentara moeloetnja bilang: „Sekarang kita-orang soeda djadi soeami-istri, jang berarti doea badan mendjadi satoe toeboe, goena apakah dioetjapken itoe perkataän?”

Achirnja Ouw Hoat adjak itoe istri doedoek bersantap, sasoedanja baroe doedoek beromongomong, teroetama tentang pertjintaän, kerna ia poen soeda oeloeng dalem hal itoe.

Sasoeda ia-orang merasa kenjang makan angin, baroelah ia-orang masoek tidoer.

kerna pembesar dan ini kerna kerna kerna poenja

Ouw Hoat sabenernja boekan *tjinta* dengan sasoenggoenja.

Begitoelan bebrapa hari berselang, satelah djoestaken Soei Yong, bahoea ia soeda pergi mengadep pada pembesar negri aken rappot itoe perkara pembedjakan, ia lantes berlajar adjak istrinja itoe poelang ka kota Tjiauw-hin.

Sadjek itoe waktoe Tjoa Soei Yong soeda dapet taoe, bahoea dirinja kombali telah djadi korban dari kadjoestaännja Ouw Hoat, tapi sekarang soeda kasep. Ia tiada bisa berboeat satoe apa, hanja toeroet sadja pada itoe „soemi” sembatan. Laen dari itoe saban hari ia tjoema bisa memoedja pada Allah, soepaja satoe waktoe ia bisa sampeken niatannja—ingetan membikin pembalesan.

Ouw Hoat ternjata boekan ada saorang jang di bawah penggaroe istrinja, sebagaimana jang terdjadi pada Pian Hok, kerna lantasi bawa Tjoa Soei Yong poelang ka roemanja sendiri, dimana ia-poenja istri sedjati ada bertjokol.

Ouw-si tiada berani berlakoe koerang adjar atawa tjoba boeat bikin soesa pada Soei Yong, hanja satoe waktoe ia soeka riboet moeloet pada soeaminja, lantaran mana baberapa kali Soei Yong, telah minta ia di pindaken sadja di laen roema. Kerna dengan adanja ia di itoe roema keadaän roema itoe djadi tiada bisa betoel, tapi Ouw Hoat

tiada perdoeliken itoe permintaän. Ia bilang, Soei Yong boleh tinggal teroes di itoe roema dan dengan tiada oesah perdoeliken pada Ouw-si. Ini sebab ia djadi terpaksa tinggal teroes di itoe roema dengan menjampoer.

Dari sini ada njata djoega, Ouw Hoat masi tjinta padanja.

Satenga taon telah berselang

Pada soeatoe hari Ouw Hoat moesti pergi ka kota radja boeat satoe oeroesan, kerna maskipoen ia ada satoe Kong-tjoe idoeng poeti, tapi ia perhatiken dengan kabesaran doenia. Di kota radja dengan oewangnja ia ingin tjoba dapetin pangkat, kerna itoe waktoe djoestroe ia ada poenja satoe kenalan jang bisa diminta perteloengannja.

Boeat pergi sendiri ka itoe kota Ouw Hoat bisa, tapi di roema ia ada mempoenjai doea istri dan bila ia pergi, ia koeatir Ouw-si nanti keniaja pada Soei Yong, maka ia laloe maoe adjak pada ini istri. Soepaja maksoednja tiada dapet di ketahoei, ia bilang maoe adjak Soei Yong pergi ka laen tempat, di mana ia ada harepan bisa dapet tangkep satoe diantara itoe badjak-badjak.

Soei Yong mengarti ia didjoestaken, tapi kerna ia pikir kaloe tinggal teroes bertjampoer sama Ouw-si koeatir nanti dibikin soesa, sedeng itoe waktoe tiada ada orang laen jang bisa toeloeng padanja, djadi ia njataken setoedjoe.

Begitoelah dengan meninggalkan istrinya yang aseli, bersama Tjoa Soei Yong pada satu hari. Ouw Hoat telah berangkat ke kota radja.

Tatkala sampai di kota radja Ouw Hoat lalu mencari satu rumah penginapan boeat ia tinggal, pada besok harinya baroe ia mencari tau, di mana ia-poenja kenalan ada tinggal.

Lama djoega ia jalan mencari, tapi belum djoega bisa ketemu, akhirnya baroe ia dapat keterangan, lantaran dihindangi penyakit yang berbahaya, kira bebrapa minggu berselang itoe pembesar telah meninggal doenia. Ini hal bikin ia jadi poatoes harapan. Dan toch ia tiada kakeoerangan daja.

Sigra djoega ia pergi pada satu kenalannya yang ada memboenjai perhoeboengan pada satu pembesar, pada siapa ia minta pertolongan soepaja bisa dapat pangkat. Ini kenalan, yang ada seorang tjerdik telah meloeloesken, tapi ia lantes minta sadjoembla oewang boeat onkost serta boeat soewab itoe pembesar, permintaan mana oleh Ouw Hoat telah diloeloesken.

Sasoeda itoe Ouw Hoat telah jalan pulang dengan senang. Di waktu tidoer ia telah mimpi telah beroleh pangkat, dengan pangkat yang mana ia beroentoeng bisa bikin dirinya jadi „terkenal” serta memboenjai banjak oewang.....

Ia telah merasa begitoe senang.

Soei Yong djadi heran koetika dapet liat itoe soeami berdjalan poelang dengan paras moeka berseri-seri dan laloe menanja, dari siapa ia dapet penjaoetan jang tiada menjenangkan hati, tjoema ia tiada oendjoek itoe pada sang soeami.

Ia djadi tiada senang lantaran pikir, tiada pantas boeat Ouw Hoat mendjadi ambtenaar negri, kerna sekarang sadja perboeatannja soeda begitoe boesoeuk, apalagi nanti kaloe soeda mendapet pangkat, nistjaja dia itoe aken goenaken pengaroehnja dalem djalan jang boekan-boekan, rampas orang poenja gadis atawa reboet orang poenja istri.

Lantaran itoe ia harep, biarlah itoe soeami tiada bisa sampeken niatannja, kerna saorang jang tiada mempoenjai kadjoedjoeran serta bermata kerandjang tiada boleh berperoentoengan mendjadi orang berpangkat.

Sampe bebrapa hari Ouw Hoat masi tinggal senang di itoe roema menginep; tatkala ampir satoe minggoe lamanja tiada dapet kabar satoe apa dari kenalannja, ia lantes pergi menengokin.

Tapi apa soeda kedjadian?

Orang jang ditjari ia tiada dapet ketemoeken.

Achirnja satelah menanja disana sini pada orang-orang jang dikenal, baroe ia dapet taoe bahoea kenalannja itoe, jang soeda soeka membri pertoeoengan padanja, telah. merat-

Itoe hal bikin Ouw Hoat djadi sanget djengkel, hingga ampir sadja ia telah ambil poatoesan nekat. Tjoba bila ia tiada dapet „inget” pada dirinja Soei Yong, nistjaja ia soeda pergi ber-djoempa pada radja acherat.

Sadjek itoe waktoe ia telah tinggal di laen roema penginepan jang harga sewanja moerah, samentara ia sendiri lantaran tiada mempoenjai pakerdjaän, berkoeli poen tiada maoe, djadi saban hari malah saban sa'at, bertjampoer gaoel sama orang-orang jang tiada kaoeroesan.

Satoe hari Ouw Hoat telah keabisan oewang, dan sebab bila tiada ada itoe „barang jang ter-oetama” ia tiada bisa tinggal idoep lebi lama, ia djadi berpikir tjara begimana bisa dapetken oewang. Boeat bisa dapet pindjem dari orang laen, itoelah ia tiada oesah harep.

Blakangan, lantaran soeda keabisan akal ia djadi „inget” pada dirinja Soei Yong, maka ia lantas dapet pikir satoe tipoe boeat akali istri itoe. Lebi djaoe ia doega, tentoe Soei Yong bakal tiada maoe toeroet kahendaknja itoe, djadi perloe ia djoestaken kombali itoe istri.

Begitoelah ia lantes djalan poelang, koetika ber-djoempa dengen itoe istri ia bilang: „Begitoe lama akoe telah berdaja boeat dapetin pangkat, dengen apa akoe bisa bales kaoe-poenja sakit hati. Tapi siapa bisa doega, sasoedanja sobatkoe

meninggal doenia, kombali akoe-poenja kenalan telah pedajaken padakoe, hingga akoe djadi roedin begini. Iloe sebab kita moesti berdaja, soepaja tiada sampe kelaparan serta moesti dioesir kaloear dari ini roema makan."

Tjoa Soei Yong tiada kata apa-apa selama mendengerin perkataännja itoe soemi, ia tjoema kasi oendjoek roepa doeka, sedeng dalem hatinja maoe bilang: Ada dengan seharoesnja kae kena orang pedajaken, kerna maksoedmoe jang bener boekan maoe tjari pangkat boeat toeloeng dirikoe, hanja boeat penoeken sadja kae-poenja hati binatang.

Ouw Hoat antep istri itoe tinggal diam, dan sambil mengawasin ia bitjara teroes; „Kemaren bersama bebrapa sobatkoe akoe telah pikir satoe tipoe. Kae akoe nanti akoeh sebagi soedara prempoan, kemoedian akoe nanti berlaga mae djoel boeat didjadien goendik. Sampe sabegitoe djaoe kae moesti bisa dapetin orang itoe poenja oewang, baroe kita lantes melariken diri ka Hoay-an, kae-poenja tempat kediaman, di mana kita nanti adoeken perkaramoe pada politie. Betoel ini hal ada sedikit tiada pantas dilakoeken olehmoe, istrikoe, tapi akoe harep kae soeka loeloesken, kerna ini ada djalan satoe-satoenja aken kita dapet oewang. Akoe berdjandji, bener-bener akoe aken anter kae brangkat ka Hoay-an."

Sasoenggoenja Soei Yong tiada senang dengan pikirannja Ouw Hoat, maski ia taoe pikiran itoe ada tiada terlaloe sala, apalagi dengan berboeat begitoe ia bisa poelang ka roemanja. Achir-achir ia laloe njataken moefaket.

Ouw Hoat djadi sanget girang. Sigra ia berlaloe dari sitoe. Ia tjari temennja jang kemaren diadjak berdani dan prentah ia itoe pergi tjari orang jang bakal didjebak.

* * *

Saorang dari kota Oen-tjoe dari provincie Tjiat Kang, Tjoe Goan namanja ada saorang jang soeda beroesia ampat-poeloe lebi, tapi belon mempoenjai barang satoe anak, prempoean atawa lelaki sedeng kainginannja adalah soepaja dapet anak lelaki boeat samboeng toeroenannja. Ia-poenja istri bebrapa kali kasi nasehat aken piara goendik, tapi itoe nasehat ia tinggal ka blakang, lantaran pikir ia belon dapet pangkat jang lebi tinggi. Ia hanja baroe dapet gelaran Sioe-tjay.

Di itoe taon, koetika ini tjerita kedjadian, ia kabetoelan ada di kota-radja, kerna ia maoe bikin examen, di mana ia sekalian tjari orang jang boleh diboeat goendik. Ia poen soeda loeloes dari oedjiannja itoe. Ia-poenja niatan itoe ia telah sampein pada bebrapa orang jang biasa melakoeken pakerdjaän mentjai goendik.

Kenalannja Ouw Hoat ada satoe diantara itoe

orang-orang jang dapet pesenan mentjari goendik, maka ia ini, satelah denger Ouw Hoat maoe tjari oewang dengan djalan goenaken djebakan, ia laloe kasi itoe pikiran. Dan demikianlah, koetika Ouw Hoat prentah ia tjari orang jang bakal didjebak, zonder banjak tjerita lagi ia lantes pergi pada Tjoe Goan.

Pendek bisa dibilang, di satoe hari Tjoe Goan bersama itoe sobat dari Ouw Hoat telah pergi ka tempat menginepnja Soei Yong, kerna ia maoe liat doeloe begimana ada itoe prempoean jang bakal djadi goendiknja, sebab ia tiada maoe tjari orang sembarangan sadja.

Tjara begitoe ia bisa pandang dengan laloeasa keadaän dirinja Soei Yong, jang telah ketemoe-ken padanja dengan roepa maloe. Tjoe Soei Yong toch, kendati ia soeda sering ikoet bebrapa soemi, ada saorang prempoean jang masi mempoenjai batin baik. Kerna segala apa jang ia lakoeken ada lantaran apa boleh boeat.

Tjoe Goan merasa penoedjoe sekali pada gadisnja Tjoe Boe almarhoem, sebaliknja Tjoe Soei Yong, koetika dapet liat kealimannja itoe Sioetjaj jang berparas tjakep, kendatipoen soeda beroesia ampir satenga abab, diam-diam telah pikir dalem hatinja: „Ini orang seperti orang jang terpeladjar, akoe heran kenapa ia boleh kena di djebak? Ach!”

Sasoeda berdiri poela bebrapa lama di hadepannya itoe Sioe-tjay jang oewangnja hendak di garoek oleh Ouw Hoat, Soei Yong lantes djalan masoek dengen pengrasaän menjesel. Ia rasanja telah dapet pikiran boeat membri perteloengan, dengen perboeatan mana ia bisa bikin impas kamenjeselannya itoe. Itoe pikiran kamoedian ia tetepken.

„Sekarang marilah kita berangkat ka roemakoe boeat tetepken harganja,” kata Tjoe Goan pada itoe toekang djebak. „Tapi kaloe kedjadian, akoe minta soepaja akoe boleh lantes ambil padanja.”

„Itoelah pasti,” djawab Ouw Hoat, kamoedian ia prentah sobatnja toeroet itoe Sioe-tjay pergi ka tempat menginepnja.

Sesaät kamoedian ia-orang soeda berlaloe dari sitee.

Sesampenja diroema menginep, itoe pembijtjaraän dibikin poetoes, jaitoe dirinja Soei Yong djadi dibeli dengen harga seratoes tail perak. Tapi Tjoe Goan berdjandji, waktue lohor aken ditrimaken oewang pembelian serta sorenja ia boleh bawä poelang itoe goendik. Ia berboeat begini, kerna ia taoe di kota-radja banjak orang lakoeken pakerdjaän menipoe dan koeatir dirinja nanti terdjeblos dalem djebakan.

Koetika orangnja membri taoe begitoe Ouw Hoat djadi bengong, tapi kamoedian ia tiada djadi

poetoes akal. Sogra ia masoek ka dalem ketemoeken Soei Yong dan bilang: Tjoe Goan maoe bawa ia poelang, tapi itoe tiada mengapa; tjoema sabentar malem Soei Yong moesti bikin itoe soemi baroe djadi mabok arak, kamoedian ia bersama temen-temennja serta satoe kapala kampong nanti dateng aken toedoe Tjoe Goan lakoeken perdjinaän. Tjara begitoe ia bisa ambil poelang itoe istri. Lebi djaoe pada Tjoe Goan nanti diantjem, apabila ia tiada maoe ganti karoegian sadjoembla oewang jang ia aken seboet, ia nanti adoeken itoe kedjadian pada pembesar politie. Achirnja Ouw Hoat bilang, tentoe ia aken dapet banjak oewang, kerna Tjoe Goan jang ada satoe Sioetjaj nistjaja aken toeroet kahendaknja lantaran tiada ingin namanja dibikin tertjemar.

Tadinja Soei Yong tiada maoe toeroet kahendaknja itoe soemi, tapi lantaran Ouw Hoat memaksa sanget dengen disertain roepa-roepa boedjoekan, djadi ia terpaksa menoeroet djoega.

Begitoelah Ouw Hoat laloe kasi orang taoe Tjoe Goan, bahoea ia itoe poenja permintaän telah ditrima, dan berbareng dengen itoe ini Sioetjaj lantas seraken itoe oewang pembelian.

Betoel sadja di itoe sore, di roema „penginepannja” lebi doeloe Tjoe Goan prentah orangnja sediaken satoe medja barang hidangan, kamoedian sembari membawa satoe djoli ia berangkat ka hotelnja Ouw Hoat.

TOKO & DRUKKERIJ
LIE TEK LONG

49

PINTOE BESAR

BATAVIA

TELEFOON 564

Tiada selang lama ia soeda balik kombali bersama itoe istri.

Sasoeda djalanken peradatan serta silaken itoe istri doedoek di hadepan medja perdjamoean, baroe Tjoe Goan dapet kenjataan jang parasnja Soei Yong ada lebi elok bebrapa lipet dari pada pertama kali ia ketemoe.

Itoelah disebabkan doeloe Tjoe Soei Yong tiada berdandan seperti sekarang.

Tjoe Goan laloe toewang arak doea tjawan, jang satoe ia taro di hadepannja itoe istri, jang laen di hadepannja sendiri, kamoedian baroe ia kata: „Nona, sekarang kita-orang soeda djadi soemi-istri, perloe apa moesti maen maloe-maloe lagi. Nah, minoemlah itoe arak.”

Mendenger perkataannya Tjoe Goan, jang di oetjapken dengan soeara lagoe menghormat, berbedah dengan itoe semoea oetjapan jang di kaloearken oleh Ouw Hoat, Soei Yong rasaken hatinja djadi piloe, kerna berbareng dengan itoe ia djadi inget sama nasibnja.

Achirnja ia djadi koetjoeri aer mata.

Meliat begitoe Tjoe Goan djadi heran, tapi ia kata: „Diliat dari kelakoeanmoe, tentoe ada apa-apa jang membikin hatimoe djadi soesa, nona, oleh kerna itoe, kaloe soeka, soedilah kae kasi

taoe itoe padakoe. Djikaloe akoe bisa membriertoeloengan, dengan senang akoe nanti korban-ken segala apa aken goenamoe. Bilanglah hal itoe padakoe."

Tjoa Soei Yong tiada menjaoet, hanja toedoekin kapala.

Tjoe Goan djoega tiada lantes mendesek, ia laloe minoem araknja dengan pelahan sekali serta saban-saban desek nasi ka dalem moeloetnja.

Lantaran doedoek makan dengan begitoe plahan dan saban-saban pandang pada itoe goendik, tiada ketaoean lagi ia soeda makan tjoekoep, sedeng itoe waktoe soeda poekoel doea. Ia merasa heran, kenapa djalannja djem ada begitoe tjepet.

„Djikaloe tiada maoe makan, marilah kita orang masoek tidoer, nona," begitoe ia kata pada Soei Yong. „Sekarang soeda djaoe malem."

Maski djoega Tjoa Soei Yong tiada membri penjaoetan, djoega ia tiada bergerak dari tempat di mana ia doedoek, tjoema dari gerak-gerakannya ada ternjata ia itoe lagi berpikir keras.

Tjoe Goan djoega tiada maoe memaksa, boeat oendjoek kesabarannya ia laloe hampirken rakboekoe, dari mana ia ambil satoe djilid, kamoedian ia doedoek kombali sambil membatja dengan asik.

Brapa lama ia-orang berdiam tjara begitoe, itoelah tiada ketaoean, tapi kadoeannya rasa soeda berdjalan lama djoega.

Selama itoe soeami membatja boekoe, bebrapa kali Soei Yong angkat kapalanja aken melirik, tapi orang jang dipandang tiada bikin gerakan apa-apa. Ia roepanja seperti tiada dapet taoe perboeatan dari istrinja itoe.

„Akoeliat, ini orang tentoe boekan ada saorang sembarangan,” koenjoeng-koenjoeng Soei Yong pikir dalem hatinja, sampe sabegitoe djaoe ia tiada dapet kenjataan jang Tjoe Goan ada saorang lelaki tjeriwis. „Kaloe diliat begini djalannja, baik akoe seraken semoea djalannja perkara dan menikah padanja, brangkali dengan begitoe sakit hatikoe bisa dibales. Dari Ouw Hoat poen akoe tiada bisa dapet apa-apa, sedeng sekarang soeda ternjata ia boekan ada satoe me-noesia jang boleh di'ikoetin teroes”

Pikiran itoe beroelang-oelang memaen dalem otaknja Tjoa Soei Yong, tapi ia tiada berani njataken itoe pada Tjoe Goan. Boekan sadja ia tiada berani lantes njataken itoe, sekalipoen taoe dirinja soeda djadi orang poenja istri, poen ia masi merasa sangsi, ia sangsiken, apa namanja tiada djadi semingkin boesoek lantaran moesti toekar soeami begitoe banjak?

Lantaran masi selaloe tinggal serba sala, djem telah mengoetaraken poekoel tiga, sedeng sabentar djem 5 ampir pagi Ouw Hoat dan kawannja aken dateng bikin soesa pada itoe Sioe-tjay. Dan toch ia masi tinggal diam.

Blakangan, sasoeda liwat bebrapa lama lagi, baroe ia bisa tetepken apa jang dipikir. Ia inget, tiada perloe ia djaga poela pada kahormatan dan namanja, sedikitnja seblon ia bisa bikin pembalesan, kerna itoe berarti tiada bisa sampeken ingetannja katjoeali nanti kaloe ia soeda basmi semoea orang jang mendjadi moesoe-moesoenja.

Djoestroe itoe kabetoelan Tjoe Goan menanja padanja, apa ia masi belon maoe tidoer, samantara djem soeda mengoetaraken semingkin pagi.

„Apa bisa djadi bahoea sedari tadi masi djadi kapoenjaännja laen orang?” Tjoe Goan berbalik menanja sambil tertawa, kerna ia kira, memang itoe istri sengadja maoe permaenken padanja, ia ada mempoenjaï kesabaran atawa tiada.

Satoe kaheranan, Soei Yong tiada toeroet tertawa.

Malah sekarang itoe istri telah mengelah napas pandjang.

Tentoe sadja hal itoe membikin ia djadi semingkin heran.

Beroelang-oelang Tjoa Soei Yong tarik napas pandjang pendek, seperti djoega orang jang hendak bikin legah apa-apa jang menggandjel lehernja, kamoedian baroe ia toetoerken tentang proentoe-ngannja jang malang; achirnja ia tjeritaken djoega, tjara begimana Ouw Hoat telah goenaken tipe boeat kedoek oewangnja itoe soemi.

Tentoe sadja Tjoe Goan djadi melengak dan merasa sanget heran atas itoe penoetoeran, lantaran mana sampe bebrapa lamanja ia tiada bisa boeka moeloet.

Itoe waktoe, dengan tjepet djem menandakan poekoel ampat.

Soei Yong taoe ia tiada boleh bekerdja dengan lambat, maka ia laloe kata pada soeaminja: „Sekarang kaeo tiada boleh bengong poela, Siangkong. Sabentar marika aken sampe di sini, dari itoe, soepaja kita-orang tiada oesah sampe kena dibikin soesa, baeklah berdaja lebi doeloe aken lindoengin diri.”

„Kaeo djangan koeatir, akoe poen soeda berpikir begitoe, istrikoe,” kata Tjoe Goan. Sekarang marilah kita pergi ka tempat menginepnja sobatkoe, jang terletak tiada djaoe dari sini, dimana kita-orang bisa melindoeng boeat satoe malem.”

„Apa tiada ada orang jang taoe kita kaloear dari sini?” Soei Yong menanja.

„Tiada, kerna ini ada satoe roema jang ditinggali olehkoe sendiri,” Tjoe Goan membri ketrangan.

„Begimana bisa djadi begitoe,” kata Soei Yong. „Apakah boekan roema makan atawa hotel tempat ini jang kaeo pake? Ouw Hoat toch bilang kaeo tinggal menoempang dalem satoe hotel?”

„Ja, ia bilang begitoe, tapi sabenernja boekan. Sekarang marilah kita berangkat.”

Sembari berkata begitoe Tjoe Goan laloe boeng-koes barang-barang jang paling perloe, teroetama oewang, kamoedian ia boeka pintoe dan bersama istrinja, Tjoa Soei Yong, teroes berangkat me-noedjoe ka roema sobatnja.

Sebagimana adanja Tjoe Goan, poen itoe sobat ada pake roema seperti ia sendiri, melaenken dilajani oleh toekang masak dan boedjang jang bisa disoeroe-soeroe. Dan ini sobat djadi sanget heran koetika denger soeara ketokan pintoe di waktoe begitoe, apalagi tatkala dapet taoe siapa adanja itoe orang jang minta noempang menginep boeat satoe malem lamanja.

Permintaännja Tjoe Goan ia loeloesken, ia laloe prentah boedjangnja bikin bersi satoe kamar kosong jang tiada dipake, kamar mana memang disediaken boeat kenalan-kenalannja bila kabetoelan dateng manenamoe.

Berbareng dengen itoe, kerna pikir masi ada tempo banjak, ini sobat jang baik laloe prentah orangnja bersama orangnja Tjoe Goan sendiri pergi ka roemanja itoe madjikan, dari mana laloe diangkoet semoea barang jang ada di sitoe, katjoeali tinggal segala barang tektek-bengek jang tiada berharga.

Kira-kira ampir djem lima baroe pengangkoetan itoe slese.

Di roemanja itoe sobat Tjoe Goan dan istrinja

tiada berboeat apa-apa, hanja tinggal menantiken di dalem kamar dengan hati kapingin taoe begimana kasoedahannja pakerdjaän dari Ouw Hoat dan kawan-kawannja.

Di itoe djem bener sadja Ouw Hoat bersama orang-orangnja pergi ka roemanja Tjoe Goan, dimana sigra marika menerdjang masoek ka dalem, sedeng doea orang telah dititaken, satoe mendjaga pintoe depan dan satoe di pintoe blakang.

Tapi koetika sampe didalem marika djadi heran.

Kamar itoe kosong seanteronja. Tiada ada apa-apa jang marika bisa dapetken. Brangkali djoega marika bisa perolehken, djikaloe ia-orang maoe bawa maboer segala perabot dapoer jang tiada ada harganja.

„Begimana ia-orang bisa taoe lebi doeloe dan telah bikin persediaän”, kata Ouw Hoat dengan hati mendongkol dan merasa heran sanget. „Sekarang tentoelah kita-orang soeda kena ditipoe kombali. Dalem ini perkara pasti kae orang ada tjampoer tangan, tapi soepaja tiada berboentoet pandjang, marilah kita bagi itoe oewang pembelian.”

„Tjilaka! Kenapa kaoedjadi berlakoe begini?” kata satoe diantara itoe kawan-kawan dengan roepa goesar. „Itoe oewang pembelian kae sendiri jang trima, mengapa sekarang kae minta pada kita? Marilah lantasi bagi-bagi!”

Ouw Hoat djadi melengak.

Kamoedian baroe ia inget, bahoea oewang itoe ia jang trima, tapi lantaran kliwat mara dirinja soeda dlitipoe kombali, ia djadi loepa sama hal itoe. Itoe sebab ia djadi tinggal diam sadja.

„Djoega begimana kae maoe salahken pada kita-orang, sedeng dalem ini hal kae sendiri ada itoe pendjoeal istri?” Satoe kawannja jang laen menanja dengan perongosin moeka. „Ati-atilah, kerna kita-orang tiada maoe ditoedoeh dengan tjara jang begitoe sembarangan! Apa kae tiada pikir, menoeroetkoe dalem ini pakerdjaän melenzen ada boeat dapetin oewang? Tida, sekarang akoe tiada maoe mengarti!”

Seabis kata beg toe, bahna maranja orang itoe lantes madjoe menjerang pada Ouw Hoat, perboeatan siapa laloe ditoeroet oleh jang laen, hingga inl soemi dari Tjoa Soei Yong jang moeloetnja tiada boleh dipertjaja dikroeboetin.

Perklaian itoe baek djoega keboeroe dibikin brenti oleh soldadoe ronda jang liwat di sitee, kaloe tiada tentoe Ouw Hoat bakal djadi binasa. Marika semoea laloe dibawa ka kantoer, di mana ia-orang nanti trima gandjaran.

Pada besok siangnja marika-poenja perkara laloe dipreksa oleh pembesar dari itoe tempat, di mana kawannja Ouw Hoat membri pengakoehan bahoea ia ini telah boeka peroesahan menipoe.

Tapi sebab marika sama-sama bekerdja, maka semoea laloe didenda tiga-poeloe tail perak, samentara Ouw Hoat sendiri lantaran di itoe tempat tiada mempoenjaï pakerdjaän, lantes di kirim poelang ka tempat kediamannja.

* * *

Di waktoe siangnja Tjoe Goan bersama istrinja dan itoe sobat telah dapet taoe apa jang semalem kedjadian di roemanja berhoeboeng dengan poe-toesannja papreksaän, tapi itoe semoea marika tiada ambil taoe. Ia dan Soei Yong tjoema bersoekoer bisa terloepoet dari itoe bahaya jang bisa bikin tjilaka dirinja.

Di itoe hari djoega ia pinda poela karoemanja jang lama, dimana ia idoep roekoen sama Soei Yong, jang ternjata ada satoe prempoean jang mengenal kewadjabannja.

Tjoe Goan sendiri merasa sanget beroentoeng, dan berbareng dengan itoe atas „pimpinannja” Soei Yong ia telah beladjar semingkin giat. Sebab tjoema dengan memangkoek pangkat sadja ia bisa lakoeken pembalesan atas itoe sakit hati dari istrinja (goendik).

Samentara menoenngoe sampe dibikin examen laen taon Tjoe Goan tinggal teroes di kota-radja, di mana sampe Tjoa Soei Yong telah melahir-ken satoe anak lelaki.

Didapetnja itoe anak soeda bikin Tjoe Goan merasa sanget girang, hingga katjintaännja pada Soei Yong djadi bertamba besar. Djoega ia tiada loepa kirim kabar ka tempat kediamannja, kabar mana soeda ditrima dengan girang oleh istrinja. Ini ia dapet taoe tatkala ia trima soerat balesan dari itoe istri jang baek boedi.

Koetika itoe anak masoek oemoer satoe taon, djoestroe waktoenja dibikin examen soeda ampir sampe, maka sadjek itoe waktue saban malem Soei Yong telah bakar doepa, pasang Hio, berdoa soepaja soeaminja bisa loeloes dari oedjian.

Kasoedahannja bener sadja Tjoe Goan loeloes dari oedjian Tjin-soe dan atas besluit dari pamerintah, ia dibenoemd djadi Tikoan dari kota Boe-tjiang.

Tatkala poelang ka roemanja, pada Soei Yong, itoe goendik jang ditjinta, Tjoe Goan kata: Tempat di mana akoe bekerdja tiada djaoe dari tempat kediamannja itoe pendjahat, akoe harep bisa lantes oeroes itoe pembalesan sakit hati."

„Djikaloe ingetanmoe itoe kesampean, maski akoe mati poen tentoe dengan senang," kata Soei Yong dengan hati girang. Ia pertjaja, nistjaja soemi itoe nanti belah betoel dirinja.

Itoe waktue djoega Tjoe Goan prentah orang berangkat ka Oen-tjioe aken kasi taoe istrinja hal ia soeda loeloes dari oedjian Tjin-soe dan bakal

bekerdja di Boe-tjiang. Lebi djaoe dipesen, soe-paja itoe istri dan orang di saroema tangga bikin persediaan boeat menantikan ia dikota Yang-tjioe dari mana marika aken berangkat bersama-sama ka tempat bekerdja.

Tentoe sadja kabar itoe disamboet dengan hat girang.

Berbareng dengan itoe ia prentah orang pergi tjari praoe sewaän, praoe mana lantes dimoeatin barang-barang jang perloe dibawa, kamoedian ia sendiri pergi mengadep pada pembesar jang lebi atas boeat membri taoe, besok ia aken moelai berangkat.

Begitoelah pada besok paginja ia lantes toeroen praoe bersama Tjoa Soei Yong, praoe mana lantes dikasi djalan menoedjoe ka kota Yang-tjioe.

Tjoa Soei Yong jang berdiam dibagian dalem telah dapet denger dengan njata soearanja orang jang mendjadi djoeragan dari itoe praoe, soeara mana ia inget seperti soearanja Tan Siauw Soe. Ia djadi girang sekali kaloe betoel praoe itoe ada kapoenjaännja orang jang mendjadi moesoe besarnja.

„Apa Siangkong taoe, siapa namanja itoe djoeragan praoe dari praoe jang kita sewa?” Soei Yong tanja soeaminja.

„Namanja Gouw Kim,” saet Tjoe Goan. „Ada oeroesan apatah istrikoe menanjaken tentang dia itoe?”

„Tjoba Siangkong silaken ia masoek ka dalem, saja ingin liat begimana matjemuja,” kata Soei Yong, jang tiada maoe kasi taoe doeloe apa jang dipikir.

Tjoe Goan toeroet kahendak itoe.

Tiada selang lama itoe djoeragan masoek ka dalem, tapi Soei Yong telah mengintip dari satoe tempat, dari mana ia liat dan dapet kenjataän orang itoe Tan Siauw Soe adanja. Ia taoe, tentoe djahanam itoe telah toekar namanja. Berbareng dengen itoe merasa sanget sakit hati, baek djoega ia bisa tahan sabar, kaloe tiada nistjaja ia soeda rangsang moesoe besarnja itoe.

Koetika Tan Siauw Soe jang bertopeng Gouw Kim soeda berlaloe, masi djoega Soei Yong tiada maoe bilang apa-apa pada Tjoe Goan, sedeng ia tiada maoe menanja apa-apa serta tiada menaro tjoeriga jang goendiknja itoe maen gila.

Satoe kali istrinja itoe djoeragan praoe telah dateng bawain thee pada Soei Yong, maka itoe koetika jang baek tiada maoe dikasi liwat dengen pertjoema oleh gadisnja Tjoa Boe.

Soei Yong laloe tanja, dia itoe orang asal dari mana.

„Akoë orang dari kota Ti-yang, Njonja,” prem-poean itoe menjaoet.

„Soeamimoe toch boekan orang dari itoe tempat djoega?” tanja poela Soei Yong.

„Ja, itoelah bener. Ia ada akoe-poenja soeami jang blakangan. Akoe-poenja soeami ada mendjadi soedagar beras, tapi lantaran dapet sakit telah meninggal doenia. Soeamikoe jang sekarang asal dari Boe-tjiang: Ia ini perna toeloeng apa-apa padakoe, maka akoe telah trima permintaännja aken ambil dirikoe seperti istrinja. Tapi setaoe begimana, ia sengadja telah pake namanja soeamikoe jang doeloe, sedeng namanja sendiri jang bener akoe tiada dapet taoe.”

Soei Yong manggoetin kapala dan bilang terima kasi atas ketrangan itoe, sedeng dalem hatinja ia merasa sanget girang. Ia pikir, tiada bisa sala lagi, dia itoe pastilah Tan Siauw Soe adanja. Sebagitoe djaoe ia masi merasa sangsi, tapi sekarang tiada ada kesangsian poelah.

Koetika itoe prempoean maoe berlaloe, ia telah persen satoe setangan jang indah, persenan mana soeda bikin itoe prempoean djadi sanget girang.

Begitoe lekas djoega Soei Yong kasi Tjoe Goan taoe, siapa adanja itoe djoeragan praoe. Ia tanja, begimana ini soeami hendak berboeat boeat tangkep dirinja itoe badjak laoet.

„Sekarang kita tiada boleh toeroen tangan doe-, doe, hanja moesti menoenggoe sampe di Boetjiang,” kata Tjoe Goan. „Djoega kita moesti tjari taoe sebrapa bisa, di mana adanja ia-poenja laen-laen kawan. Sekarang biarlah kita djangan bitjaraken

poela ini hal, kerna koeatir dengan tiada disengadja ia dapet ketahoei.”

Tjoa Soei Yong menoeroet. Ia pikir begitoe ada paling bener.

Pada satoe hari itoe praoe telah sampe di pelaboean Kang-tjioe itoe tempat di mana istrinja Tjoe Goan menantiken, tapi ini istri belon djoega sampe, maka terpaksa Tjoe Goan jang moesti menantiken.

Perloe djoega diterangin, praoe itoe sampe di waktoe siang.

Di itoe tenga-hari, djoestroe Tjoe Goan sedeng doedoek beromong-omong bersama istrinja di dalem praoe, tiba-tiba ia denger ada soeara riboet-riboet digili-gili soengei, maka ia lantes prentah orang pergi mentjari taoe.

Tiada berselang lama itoe orang soeroean soeda balik kombali membri taoe, bahoea di pinggir soengei telah terbit pertjektjokan antara djoeragan praoe dan doea orang laen jang tiada dikenal, dan pertjektjokan itoe diachirken dengan perklaian.

„Bawa marika semoea ka hadepankoe?” mamerintah Tjoe Goan.

Bebrapa anak praoe lantes lompat ka darat dan kamoedian balik kombali bersama itoe tiga orang jang baroesan abis adoe kepelan. Semoea orang itoe telah berloetoet di hadepannja.

„Mengapa kae-orang lakoeen itoe perklai-an?” Tjoe Goan moelai menanja.

„Marika berdoea doeloe ada djadi akoe poenja pasero,” kata djoeragan praoe, „tapi pada satoe hari marika telah melariken diri dengan bawa maboer oewang poko. Sabegitoe lama akoe tjari padanja belon djoega bisa ketemoe, hingga ini hari akoe beroentoeng bisa dapetken padanja. Dengan baik akoe minta ia bajar poelang itoe oewang jang dibawa lari, tapi lantaran marika tiada maoe bajar, maka terpaksa itoe hal hendak dibikin abis dengan adoe tenaga.”

„Apa bener kae berdoea telah tipoe kawan-moe?” Tjoe Goan tanja itoe doea orang sambil menoendjoek pada djoeragan praoe.

„Tida, itoe tiada bener!” satoe diantarahnja membanta. „Semoea djoesta apa jang ia bilang!”

„Nah, oendjoeklah ketranganmoe!” kata Tjoe Goan.

„Memang doeloe kita-orang ada bekerdja ber-seroeh menjewaken praoe, kata poela itoe orang dengan ketrangannja. „Pada satoe hari, koetika kita-orang hadeipken peroentoengan bagoes, ia telah begitoe tergila-gila dengan saorang prempoean moeda hingga bisa dibilang telah loepa daratan. Tapi kita-orang jang koeatir perboeattannja itoe nanti datengken bahaja pada diri sendiri, dengan bermoefaket lebi doeloe telah singkirken diri

seraja bawa itoe oewang jang haroes djadi kita-poenja bagian. Inilah ada itoe sebab mengapa ia djadi berklai sama kita-orang."

„Siapa kae-orang poenja nama?"

„Namakoe Sim Tiat Yong," kata jang satoe.

„Dan akoe Tjin Siau Goan," djawab jang laen.

„Njonja minta bitjara pada Lo-ya," kata satoe boedak prempoean dari blakang.

Tjoe Goan mengarti jang istrinja maoe bitjara, maka papreksaännja itoe ia toenda. Sigra djoega ia masoek ka dalem ketemoeken istrinja.

„Namanja itoe doea orang saja taoe ada djadi kawannja Tan Siau Soe," kata Soei Yong, lantafan itoe, baek Siang-kong djangan kasi marika bisa lolosken diri."

„Djikaloe begitoe tiada boleh ditoenggoe sampe di Boe-tjiang," kata Tjoe Goan, jang lantes kaloe ar kombali.

Sigra djoega Tjoe Goan prentah bebrapa toekang prace tawan itoe tiga orang, samentara satoe toekang praee laen dititahken pergi panggil kapala kampoeng, pada siapa itoe tiga orang tawanan telah diseraken.

Berbareng dengan Tjoe Goan kirim kaartjis namanja pada pembesar Thay-sioe dari tempat aken minta soepaja perkara itoe dipreksa, serta lebi djae minta ditjari djoega kawannja Tan Siau Soe jang laen-laen.

Thay-sioe di itoe tempat ternjata ada saorang radjin dan mengenal kewadajiban, kerna di itoe hari djoega ia prentah orang bawa mengadep itoe tiga orang tangkepan.

Tan Siauw Soe merasa tiada enak dengen itoe kedjadian atas dirinja, kerna ia telah dapet rasa jang perkaranja itoe aken membawa boentoet jang tiada bagoes. Dan pikirannja itoe djadi lebi kalang-kaboet.

Waktoe moelai madjoeken pertanjaän, Thay-sioe tiada maoe seboet nama „Gouw Kim”, hanja seboet nama „Tan Siauw Soe” sadja, hal jang mana soeda bikin ini orang djahat djadi ketakoetan.

Bebrapa kali Thay-sioe oelangken itoe pertanjaän dan bebrapa kali djoega Tan Siauw Soe masi tiada maoe mengakoeh dan bilang bahoea „Gouw Kim” ada ia-poenja nama aseli.

Boeat oeroesan ini sadja moesti digoenaken banjak tempo lantaran Tan Siauw Soe masi menjangkal teroes, tapi lantaran katjerdikannja itoe pembesar ia mengakoeh djoega, malah ia toetoerken apa jang mendjadi sebab ia pake nama „Gouw Kim,” pengakoehan mana telah dibenerken oleh ia-poenja istri.

Achirnja dari papreksaän adalah Tan Siauw Soe telah bikin pengakoehan teroes-maneroes.

Boekan sadja ia telah mengakoe tentang perboe-
tannja atas dirinja Gouw Kim, jang ia kerdjaken
dengan bantoean istri dari itoe soedagar beras
jaitoe Gouw Kim telah dibinasaken dengan djalan'
diratjoenin.

Atas itoe pengakoehan Gouw-si telah sangkal
dengan keras malah ia maoe beratin dirinja Tan
Siauw Soe, tapi penjangkalannja itoe tiada bisa
ditrima, lantaran bebrapa toekang praoe jang telah
bekerdja pada soeaminja telah membri ketrangan
dari kedjadian jang sebenernia.

Thaij-sioe toelis dengan terang itoe semoea
pengakoehan, kemoedian pada itoe semoea per-
sakitan, tiada perdoeli lelaki atawa prempoean
telah didjalanken hoekoeman rangket ampat-poeloe
rotan, baroe ia-orang dikasi mengerem dalem
pendjara aken menoenngoe poetoesan dari pem-
besar sebla atas.

Salesenja papreksa'an Thaij-sioe laloe pergi
ketemoeken Tjoe Goan di kandaran aernja aken
membilang trima kasi, jang ini Ti-koan soedah
seraken itoe perkara penting atas dirinja, ber-
hoeboeng dengan perkara mana ia bisa dapet
gandjaran, sedeng Tjoe Goan sendiri membales
mengoetjap trima kasi, sebab berhoeboeng de-
ngen itoe perkara, ini Thay-sioe djadi membri
bantoean atas dirinja dalem perkara bikin pem-
balesan sakit hati dari kaoem Tjoa.

Tegesnja itoe doea pembesar saling membilang trima kasi.

Sasoeda bitjara poela sakoetika lama, Thajisioe laloe permissie balik ka kantoornja, dianter sampe di darat oleh Tjoe Goan, bakal assistent-resident kota Boe-tjiang.

Di itoe pelaboean Tjoe Goan tiada oesah mantiken lama-lama, kerna bebrapa hari berselang ia-poenja istri bersama bebrapa pengikoetnja telah sampe, ia samboet dengan hati girang.

Tjoa Soei Yong sendiri telah ketemoeken itoe istri aseli dari soeaminja, jang trima dengan manis malah ini istri jang baik boedi dan ingin betoel mempoenjaï anak, telah samboet anaknja Soei Yong dengan goembira.

Tentoe sadja kedjadian itoe ada mengasi pemandangan jang senang pada dirinja Tjoe Goan dan Tjoa Soei Yong. Tjoe Goan merasa senang jang istrinja tiada persalaken ia piara istri ka doea, soeka sama dirinja Soei Yong, teroetama pada anaknja, dan Soei Yong sendiri merasa senang, jang ia, boekan tiada dibentji oleh itoe istri pertama dari soeaminja, malah ini istri tjinta dirinja seperti soedara, begitoe djoega itoe katjintaän pada dirinja ia-poenja anak.

Dengen begitoe, tentoe sadja itoe familie djadi idoep dengan roekoen. Tjoema berbareng dengan itoe ada apa-apa jang membikin tiada enak bagi pengrasa'an gadisnja Tjoa Boe.

Berbareng dengan naeknja itoe istri ka dalem praes, Tjoe Goan laloe kasi prentah aken praenja dikasi djalan menodjoe ka kota Boe-tjiang, ka kota mana tiada lama berselang ia telah sampe.

Sadjek bekerdja di itoe tempat, Tjoe Goan oendjoek betoel ketjakepannja. Semoea pakerdja'an ia oeroes dengan beres, dan hal jang membikin ia dan Soei Yong djadi girang, adalah ia beroentoeng bisa tangkep doea kawannja Tan Siauw Soe jang berdiam di itoe kota. Itoe doea badjak ia kirim ka Yang-tjioe aken dipreksa oleh pembesar dari itoe tempat sekalian bersama jang soeda dapet ditangkep.

Kira-kira bekerdja di itoe tempat boeat tiga taon lamanja, lantaran ketjakepannja ia telah di angkat mendjadi Gisoe, hingga kenaekannja itoe membikin banjak ambtenaar jang mendjadi heran. Sebab, begimana dari pangkat Ti-koan bisa lompat naek begitoe tinggi.

Djoega ia dapet titah aken bikin inspectie di tempat² jang masoek dalem bilangan Hoaij-ijang.

Pada waktoe hendak brangkat boeat melakoeken kewadjibannja itoe, Tjoa Soei Yong telah membri pesenan padanja: apabila ia sampe di kota Yang-tjioe moesti toeloeng liat, begimana ada kasiedahan papreksa'an dari pembesar di itoe tempat teroetama apa itoe badjak soeda dapet bagiannja. Kerna kaloe soeda selese, ia hendak bikin sem-bajang besar pada kadoea orang toeanja.

Lebi djaoe Tjoa Soei Yong bilang, doeloe ajahnja perna piara satoe boedak prempoean jang bernama Pek Lian, tapi sebab iboenja tiada soeka, maka ini boedak disoeroe poelang djoestroe lagi mengandoeng boeat satoe boelan lamanja. Ia dapet denger itoe boedak telah melahirken satoe anak lelaki, maka ia minta Tjoe Goan tjari boedak itoe serta rawatin, soepaja anaknja bisa menjamboeng toeroenannja kaoem Tjoa jang soeda poetoos.

Seabis membri itoe pesenan jang ia minta di perhatiken betoel, Soei Yong telah berloetoet sambil menangis piloe, hingga sang soemi djadi toeroet terharoe. Ia djandji nanti lakoeken betoel apa jang dipesen oleh itoe istri piaraän jang ia anggep ada istri betoel.

„Itoe hal djangan boeat koeatir, istrikoe,” kata Tjoe Goan. „Seperti djoega permintaänmoe jang laen jang akoe soeda lakoeken dengen betoel, demikianpoen dengen ini. Begitoe lekas akoe soeda bekerdja slese, akoe nanti lantes kirim soerat boeat membri taoe padamoe. Tapi akoe harep, samentara itoe kaoe djangan boeat pikiran satoe apa.”

Tjoa Soei Yong djadi sanget girang atas itoe djandji. Memang ia pertjaja betoel pada itoe soemi, maka ia doega tentoe, permintaännja nanti dilakoeken dengen bener, tapi tiada seperti itoe lelaki-lelaki keparat pada siapa lebi doeloe

ia perna seraken diri, jang tjoema ingin ia-poenja kasenangan.

Sigra djoega Tjoe Goan telah brangkat dari Boe-tjiang.

Pertama ia berangkat ka Hoay-an aken mentjari Pek Lian dan Tjoe Tjay, soeaminja Pek Lian jang dinikaken oleh Tjoa Hoe, kerna ini ponggawa tiada maoe sia-siaken satoe prempoean jang ia perna anggep sebagai istrinja dengan djalan jang boesoek.

Atas bantoeannja pembesar dari itoe tempat Tjoe Goan beroentoeng tjari Tjoe Tjay dan Pek Lian, sedeng marika-poenja anak soeda beroesia delapan taon.

Anak itoe ia kasi nama Tjoa Siok, soepaja mendjadi tanda boeat itoe penjamboengan toeroenan pada kaoem Tjoa, sedeng Tjoe Tjay dan Pek Lian dibriken segala apa jang mendjadi kasenangannja. Tjoa Siok sendiri ia kasi mengikoet dirinja.

Di itoe hari djoega ia toelis soerat pada pembesar di kota-radja, soepaja Tjoa Siok bisa di akoe sah sebagai poetranja Tjoa Boe, jang telah binasa dalem tangannja badjak laoet waktoe hendak mendjabat pangkatnja.

Lebi djaoe dalem itoe soerat ia minta, soepaja ia bisa dibriken kakoeasa'an aken preksa perkara-nja itoe badjak-badjak jang berboeat djahat atas dirinja satoe ambtenaar negri.

Rapportnja Tjoe Goan ditrima baik oleh pemerintah agoeng, begitoe poen permintaännja telah diloeloesken, maka koetika berangkat sampe di itoe tempat ia lantes bikin papreksaän kombali atas dirinja Tan Siauw Soe dan bebrapa kawannja.

Papreksaän itoe dilakoeken dengan gampang oleh Tjoe Goan, kerna memang itoe delapan pendjahat, sembilan sama Tan Siauw Soe sendiri, telah akoeh semoea kadosaännja. Semoea telah didjatoken hoekoeman mati lantaran orang jang dirampas dan diboenoë ada pembesar negri serta koelawarganja, djoega brikoet bebrapa banjak boedjang.

Itoe sembilan kapala telah ditaro di'atas medja di gredja Seng-hong-bio di itoe tempat mana Tjoe Goan djalanken oepatjara sembajang. Kamoedian baroe dikoeboer kombali bersama masing-masing badannja.

Sasoedanja oeroes itoe semoea, di satoe tempat di itoe kota Tjoe Goan diriken satoe gedong jang moengil, di mana Pek Lian bersama Tjoe Siok ada tinggal, sedeng Tjoe Tjay, sengadja di briken oewang soepaja boleh menikah poela.

Tjara begitoe Tjoe Goan soedah lakoeken doea kewadjibannja, maka lantes ia toelis doea poetjoek soerat. Jang satoe rapport boeat pemerintah agoeng, jang laen boeat Tjoe Soei Yong sendiri.

- Di hari jang ia trima soerat dari soeaminja, Tjoa Soei Yong rasakan dirinja djadi leloeasa sekali. Ia rasaken segala apa jang menggandjel hatinja telah djadi linjap dengan sakoenjoeng-koenjoeng.

Begitoelah sambil angkat ka tinggi tangannja seraja mendongak kadengeran moeloetnja berkemak-kemik, seperti djoega orang jang lagi njatken soekoer pada Allah. Tapi sabenernja itoe semoea ada ditoedjoeken pada Tjoe Goan, itoe soemi jang telah belah betoel padanja.

Di itoe malem ia mandi sampe bersi dan berdandan dengan rapi, kamoedian baroe masoek ka dalem kamarnja, di mana ia menoelis dengan asik, tapi samentara menoelis kliatan aer matanja toeroen mengoetjoer dengan deres. Sasoedanja menoelis slese, soerat itoe ia letakin di'atas medja.

Lama djoega ia koetjoeri aer mata, tapi ia tiada maoe kasi denger soera menangis, lantaran koeatir nanti ada jang hampirken padanja, lantaran itoe djadi tiada ada orang jang dapet taoe apa jang di perboeat.

Achirnja ia bikin poetoes napasnja dengan djalan menggorok leher sendiri dengan goenting jang tadjem. Tjara begitoe ia tinggalken ini doenia jang pana.

Tentang meninggalnja itoe, orang baroe taoe sasoeda liwat bebrapa djem, jaitoe koetika satoe

boedak jang biasa lajanin padanja dateng masoek di itoe kamar, kerna liat dalem begitoe lama itoe njonja tiada kaloe ar dari kamarnja.

Taij Naij-naij jang dikasi taoe itoe kedjadian soeda menangis sedi lama sekali, sasoedanja semoea boedak memboedjoekin, baroe ia prentah oeroes itoe mait dan bebrapa hari berselang telah dikoeboer dengan segala kahormatan.

Sasoeda beres lakoeken itoe semoea, baroe itoe soerat peninggalannja Tjoa Soei Yong di boengkoes dengan rapi dan dikirim pada Tjoe Goan seraja bri-taoe, apa jang kedjadian diroema. Koetika merima itoe kabar serta membatja soerattja Soei Yong, Tjoe Goan djadi djato pangsan dan kamoedian menangis tersedoe-sedoe. Ia merasa begitoe soesa hati atas meninggalnja itoe istri jang tertjinta.

Lantaraa itoe kamoedian ia dapet sakit berat.

Apatah boenjinja itoe soerat peninggalan?

Itoelah ada kira-kira seperti jang dibawah ini

Goendik jang renda Tjoa Soei Yong
dengan ini membri slamet tinggal
pada Siang-kong

Yong poenja diri ada anak prempoeannja satoe
penggawe negri dari kalangan militair, tapi ber-
beda dengan kebanyakan gadisnja orang-orang
peprangan, saja tiada mengarti satoe apa prihal

ilmoe silat, satoe ilmoe jang bisa diboeat mendjaga atawa membela kahormatan, sebaliknya tjoema mengarti tentang pakerdja'n oemoem dar orang prempoean.

Kahormatannja orang lelaki ada dengan mamegang tinggi kebaekan namanja, samentara kahormatannja orang prempoean adalah dalem kalangan kahormatan atawa lebi teges dibilang kasoetjian diri. Kerna kaloe tiada begitoe, jaitoe tiada bisa pegang tegoeh kahormatan atawa kasoetjian diri, apatah bedanja dengan segala binatang?

Ajahkoe, lantaran tiada mae boewang kasoe-ka'annja minoem arak, itoe minoeman jang akoe anggep paling terkoetoe telah ngalamken kasoesa'an hingga merembet pada iboekoe, soederakoe dan dirikoe sendiri, tiada oesah dibilang pada itoe sekalian loedak dan toekang praoe jang hendak membri perteloengan. Sabetoelnja bareng di itoe waktue, lebi baek dirikoe djoega dibinasaken, tapi siapa taoe itoe pendjahat sengadja telah kasi akoe tinggal idoep dan rampas djoega akoe poenja kamerdikaän serta kasoetjian diri, satoe perboeatan jang mendateng kaboesoekan besar atas dirikoe.

Pertama dibikin begitoe, memang akoe soeda berpikir boeat tjari djalan aken linjapken njawa sendiri, sebagaimana doeloe akoe perna bilang

pada Siang-kong, tapi niatan itoe kamoedian akoe batalen lantaran ingin bikin pembalesan. Akoe terpaksa soeda bikin diri djadi terdjeblos lebi dalem djoerang kahinaän dan itoe melaenzen boeat pembalesan, ja boeat pembalesan atas itoe sakit hati jang tiada bisa dibilang besarnja. Begitoelah, dengan tebelken moeka, satoe perboeatan jang seblonnja akoe tiada aken lakoeken akoe soeda oendjoek kesabaran loear biasa boeat menoenngoe waktoenja pembalesan dibikin.

Doeloe Lie Tjiang-koen, dengan menahan rasa maloe besar telah menaloek sama bangsa Tartar, dan itoe semoea tjoema dilakoeken boeat membela boedinja keradjaän dan Keizer Han. Dan akoe, maski ada saorang prempoean, tapi masi ada mempoenjaï pengrasaän pri-kamenoesiaän dan ka sabegitoe kali djoega akoe telah berlakoe dengan tiada memperdoelieken diri sendiri jang semingkin lama djadi semingkin boesoe, hingga achir-achir akoe telah bisa ketemoe sama Siang-kong dalem itoe keadaan jang tiada didoega. Ja, memang djoega siapa jang bisa njana, dari itoe pertemoean jang aneh kita-orang sampe bisa mendjadi soemi-istri

Pada pertama kali, maski akoe telah rasa Siang-kong boekan ada itoe orang-orang jang akoe pandang enteng, toch akoe dapet kenjataän bahoea djangan-djangan akoe tiada bisa sampeken

poela itoe niatan membales sakit hati lantaran akoe poenja hati soeda dibikin dingin oleh itoe bebrapa lelaki jang tiada haroes diseboet satoe elaki, hanja lebi pantes kaloe dibilang saorang prempoean jang tiada mempoenjaï pikiran. Tapi kerna akoe dapet pikir aken selaloe membikin pertjobaän, maka akoe soeda trima djoega dirikoe didjadiken goendik oleh Siang-kong, apapoela akoe dapet kenjataan Ouw Hoat boekan ada itoe orang lelaki jang boleh di'ikoetin lebi lama lagi. Lantaran itoe, maka akoe telah rasaken dirikoe di waktue seperti berada dalem satoe praoe jang sedeng berlajar di laoetan ada berombak besar serta itoe praoe ada dikemoediken oleh satoe djoeroemoedi jang tiada terkenal, hingga akoe dapet pikir: Djikaloe itoe djoeroemoedi betoel ada saorang pande, nistjaja akoe aken sampe pada satoe tempat jang slamet, samentara itoe djeroemoedi ada satoe toekang praoe jang gedjos, nistjaja dirikoe bakal djato dalem laoetan dari bahaya kematian, dari mana saja moesti bikin pertjobaän poela boeat menoeloeng diri sendiri.

Tapi, tapi sekarang akoe dapet kenjataan jang djoeroemoedi itoe ada satoe toekang praoe jang pande, dan itoe toekang praoe ada Siangkong sendiri, akoe-poenja soemi jang tertjinta hingga boekan maen besarnja akoe poenja rasa beroen-oeng dan soekoer atas parboeatanmoe itoe soeda

membelaken akoe poenja diri. Tjobalah mana kala tiada ada Siang-kong, belon taoe sampe kapan itoe sakit hati jang semingkin lama mengerem semingkin heibat dalem hatikoe bisa dibales! Itoe sebab, lagi sekali akoe moesti njataken, akoe beroetang boedi besar dari padamoe.

Sekarang, sasoedanja barang jang mengandjel dalem hatikoe bisa dibikin linjap, ada laen roepa kotoran jang akoe moesti bikin bersi, dan kotoran itoe jang ada loear biasa, jaitoe tiada seperti kotoran jang biasa, maka moesti ditjoetji dengan mengorbankan akoe poenja djiwa sendiri.

Apatah adanja itoe kotoran?

Kotoran itoe adalah itoe kahinaän jang akoe telah trima dari menoesia-menoesia binatang, itoe toekang poewasken napsue hatinja dengan tiada menginget pada Allah! Dan itoe kotoran akoe soeda trima dengan sabar lantaran moesti lebi doeloe bikin linjap hati jang menggandjel. Sekarang itoe gandjelan, sebagaimana diseboet di atas soeda linjap, maka berbareng dengan itoe akoe moesti linjapken djoega itoe kotoran. Begitoelah sekarang akoe soeda lakoeken itoe kewadajiban memboewang kotoran, kerna begitoe lekas Siang-kong dapet batja ini soerat, dirikoe soeda tiada ada lagi di doenia fana, hanja berada dalem doenia kabakaän.

Akoe perloe terangken djoega, Siang-kong,

bahoea katjintaänkoe sampe ini saät masi belon terlinjap, demikian djoega tentoe adanja Siangkong poenja rasa tjinta. Lantaran itoe akoe merasa berat aken lakoeken pemboenoean pada dirinja sendiri pada permoela kali, tjoema lantaran ter-soeroeng dengen ingetan jang keras, apa poela boeat bikin Siang-kong poenja nama tiada toeroet djadi boesoek lantaran memiara dirikoe, saorang jang soeda djadi sanget boesoek, maka akoe telah kerasken hati dan lakoeken djoega ini perboeatan.

Boeat menoelis lebi djaoe akoe tiada bisa, Siang-kong, maka toelisan ini akoe toetoe sampe di sini dengen pengharepan Siang-kong nanti idoep roekoen bersama Nay-nay, satoe njonja baek boedi jang nanti membri kasenangan tjoe-koep pada Siang-kong. Djoega akoe minta dengen sanget, soepaja Siang-kong nanti rawat dengen baek kita-poenja anak, itoe anak satoe-satoenja jang akoe terpaksa tinggalken dengen hati tegah. Tapi apa adanja itoe kategahan tentoe Siang-kong bisa dapet taoe sendiri.

Nah, slametlah tinggal boeat selamanja, Siang-kong!

Demikianlah ada boenjinja itoe soerat.

Tentoe sadja Tjoe Goan djadi djato pangsan satelah mambatja itoe soerat jang pengabisan dari

istrinja, sedeng itoe istri sendiri ia tiada dapet liat moekanja, baik waktoe menoetoep mata ma-oepoen sasoeda meninggal doenia. Ia tjoema dapet liat sadja soerat peninggalan itoe jang di toelis oleh Tjoa Soei Yong sendiri.

Begitoelah, lantaran terlaloe banjak memikir dirinja itoe istri, jang ia dapet kenjataan adasorang prempoean soetji, jang paling pertama ia djadi dapet sakit heibat, hingga penjakit itoe ada membahajaken seksli bagi dirinja. Tjoba bila ia tiada inget, begimana ada pesenannja Soei Yong, jang minta ia oeroes betoel pada anaknja, nistjaja ia soeda soesoel istri itoe di doenia baka. Itoe sebabnja, mengapa tiada bebrapa belas hari kamoedian ia telah semboe betoel dari penjakitnja itoe.

Selama rebah di pembaringan, bebrapa banjak pembesar di itoe tempat jang dateng padanja aken menanjaken ia-poenja keslametan seraja membri roepa-roepa hiboeran. Dan ada djoega jang menanjaken, apa jang mendjadi sebab dari penjakitnja itoe, kerna bebrapa thabib jang di oendang tiada ada satoe jang mampoe kasi obat, hanja semoea membri nasehat ini inpecteur moesti senangin hati kaloe tiada penjakitnja mendjadi semingkin berat.

Kerna pikir tiada ada halangannja kaloe orang dapet taoe sebabnja, maka Tjoe Goan laloe tje-

ritaken segala apa dengan terang tentang dirinja Tjoa Soei Yong. Berhoeboeng dengan tjeritanja itoe ia depet kasenangan, kerna boekan sadja tiada ada satoe orang jang tjelah perboeatannja itoe serta djoega perboeatannja ia-poenja istri, malah sasoeatoe orang telah membri poedjian, baik pada dirinja sendiri, jang dikataken soeda penoeken orang poenja pengharepan, maoepoen, pada dirinja Tjoa Soei Yong, jang dikataken ada saorang prempoean soetji jang loear bisasa. Marika bilang, tiada ada laen orang prempoean jang nanti bisa lakoeken itoe hal seperti apa jang di perboeat oleh istrinja.

Sadjek semboe betoel dari penjakitnja, Tjoe Goan oeroes betoel kewadjibaanja, kamoedian, satelah tjoekoep mendjalanken pakerdjaän sebagai inspecteur sigra djoega ia poelang ka kota-radja, di mana ia tinggal sampe beroesia tinggi bersama istri dan anaknja jang dikasi nama Tjoe Bouw.

Di kota-radja ia tiada pegang pakerdjaän pada negri lagi hanja tinggal teroes sebagai orang particulier, dengan toentoet pengidoepan mana ia tjoema toengkoelin pada anaknja sadja.

* * *

Demikianlah ada achirnja tjerita: **KESABARAN BOEAT PEMBALESAN**, satoe tjerita jang kita harep nanti diboeat toeladan baik oleh sasoeatoe pembatja lelaki teroetama prempoean.

T A M A T.



TEMPAT IBADAT TRI DHARMA
HOK AN KIONG

JL. PEMUDA 100
TELP. 240.

MUNTILAH